

ROMANOS

Yi Necy Huidi San Pablo Yajniejx Je Mibijcpidijc Jim
Roma

¹ Ich Pablo tumbich ma Jesucristo ytung. Jesucristo ti xyajñibicyich co nduna'ñich ma yi' ytung quipxy miid yi' y'apóstol ajcxy. Ti xypidägyich ma jada tung tügjijp co ngapxhuäcxibich Dios y'ayuc ytiy'ajt oybi.

² Dios jecy'ajty y'ayuc yajhui'my cojay ma yi' y'ayucnajtzcaxxiybi ñecy co quexa'ñ anajty je Cristo ya naaxhuiñ. ³ Ngapxhuäcxycich jada ayuc jadu'n nej ajt nHuindzin Jesucristo, je Dios y'ung, yma'xung'ajty ya naaxhuiñ. Hue' yi' ñinicx paty ma ytaj. E yi' ytaj je rey David je' ymij'ap'ajti ymijteedy'ajti. ⁴ Per Jesucristo ti paady ma Dios yi' yjihui'ñ ymic'ajt. Co Dios yajjugypijcy y'ung ma anajty ti y'ögy miid yjihui'ñ ymic'ajt, chi ti yajnejhuüy anajty je naaxhuiñyäjy co Jesucristo hue' je' Dios y'ung, huidibi miid huadz yjot huadz yhuinma'ñ, etz nañ ymiid Dios yjihui'ñ ymic'ajt. ⁵ Co Dios yajjugypijcy Jesucristo ma anajty ti y'ögy, chi mijmay'ajt tuñ miid ich ajt ycixpi. E nañ miid Jesucristo ycixpi Dios ti xyajñibicyich co ngapxhuäcxibich yi' y'ayuc ytiy'ajt ma yi mayjäy ajcxy ma tüg'óciy naax cajp, jigix jëbi mayjäy mibijccixy e nañ capxymidoogixy Jesucristo. ⁶ E miich ajcxy huidibi tzinaayb jim ma yi cajp huidibi xiijp Roma, nañ jadu'n Dios miich ajcxy ti xyhuin'ijxcixy jëbi ajcxy Jesucristo xyjäy'adyii.

⁷ Jada necy nguejxypich ma miich ajcxy nidüg'óciy huidibi jim yajpatcixp ma yi cajp huidibi xiijp Roma. Dios miich xychojccixp xyjihuiygyixp, e nañ Dios ti xyhuin'ijxcixy jaydëbi yi' xyjäy'adyii, etz nañ jaydëbi

mdzinaaygixy miid huádz mjot huádz mhuinma'ñ. Huen ñich ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz nañ xyajjotcugñhuip ajcxy.

Pablo nicxy mibijcpidijc cogapxñhua'ñ jim Roma

⁸ Tim jayijp nyajnajxpich jaygidaacin ma Dios, miid Jesucristo yxñ, co miich ajcxy ti mmibijccixy Jesucristo. Mayjä ma nidüg'óciy naax cajn ti nejhuiyigixy jadu'n nej miich ajcxy ti mmijpidaaccixy Jesucristo. ⁹ ñich tumbich cixyot huinjot ma Dios ytung, co ngapxhuäcxyich Dios y'ayuc ytiy'ajt miid Jesucristo ycixpi. Dios yi' tiy'ajt yegip jadu'n nej jabom jabom Dios nmibijctzooyich miid miich ajcxy ycixpi. ¹⁰ Dios nmibijctzooybich pen yi' jadu'n tzojcp co jëbi nnicxyich cham tiempo jim ma miich ajcxy myajpaady. Canaag'oc ñich miich ajcxy nicxy nja'ixaangixy, e ca' y'oyiy nej ñícxibich. ¹¹ Ooy njani-jot'atyich co ñich miich ajcxy nicxy n'ixaangixy, jaydëbi ngapxhuäcxybich Dios y'ayuc ma miich ajcxy miid Dios yjñhui'ñ ymic'ajt, e nañ ngapxhuäcxybich Dios y'ayuc ma miich ajcxy jaydëbi tiydudägy mmibigipy ajcxy Jesucristo. ¹² Pen oyiyb nej ñícxibich ma miich ajcxy myajpaady, chi jëbi njotcugñhuibyich co anajty n'ixyich nej miich ajcxy mibijccixy Jesucristo, e nañ jaydëbi njotcugñhuipy miich ajcxy co anajty m'ijxcixy nej ñich nmibicyich Jesucristo, e jadu'n nayyajjotcugñiyim miñ xyipy.

¹³ Ndojocypich co miich ajcxy mnejhuñhuipy co canaag'oc ti njapidägyich nhuinma'ñich co anajty nnicxa'ñich ma miich ajcxy myajpaady, e ca' y'oyiy nej ñícxibyich. Njijp'ijxypich co oyñhuip jadachambi tiempo jadu'n nej jëbi nñícxibyich jim ma miich ajcxy. Com njacyaj'ixpigaamybich miich ajcxy, e nañ

njacyajmibigaamybich ajcxy Dios y'ayuc. Tim jadu'n nej nduñich canaag agajp ma chinaaygixy yi jacjadyii jäy huidibi ajcxy ca' yjudíojäyity. ¹⁴ Dios jadu'n xyajñibijcich jada tung, paady copicy co ngapxhuäcxibich yi' y'ayuc ma tüg'óciy jäy, etz majaty naax cajp. Ngapxhuäcxamybich Dios y'ayuc ma yi jäy ajcxy huidibi griego ayuc cápccixp, etz ñan ma yi jäy ajcxy huidibi ca' griego y'ayuc capccixy. Ngapxhuäcxamybich Dios y'ayuc ma yi ixpicy jäy ajcxy, etz nañ ma yi jäy ajcxy huidibi ca' y'ixpicyity. ¹⁵ Paady ycixpi ooy ndzachcapxhuäcxa'ñich Dios y'ayuc ma miich ajcxy huidibi yajpatp jim Roma nañ jadu'n.

Je ayuc tiy'ajt oybi

¹⁶ Ca' nmidzo'ydunyijjich Cristo y'ayuc ytiy'ajt. Com je' jada je oybi ayuc huidibi tzoom ma Dios, ymiid yi' Dios ymic'ajt jigix jëbi tüg'óciy jäy ajcxy paadipy pocy huinmeecxin, pinjaty cöbìgaamb Cristo y'ayuc. Tim jayijp ti ngapxhuäcxy Jesucristo y'ayuc ytiy'ajt ma yi judíojäy ajcxy, e jac'axam ma yi huidibi ajcxy ca' yjudíojäyity. ¹⁷ Jesucristo ytiy'ajt xyajnejhuüiyim co nmibijcim co Cristo ti jöch ajt nbocy etz nxihuín, chi Dios xycöbìgaanim jadu'n nejjuhuüy tudägyjäy. Ca' ji jadüg huinma'ñ nej Dios jëbi xycöbìjxim jadu'n nej jihuüy tudägyjäy. Com jadu'n jaybety y'ity ma Dios ñecy ma jadu'n yminañ: “Pinjaty tudägy'ajtin ti paady miid co ti mijpidägy Dios y'ayuc, hue' je' tzinähuip, ca' yjugy'ajtin ycixipy ytigoyipy.”

Je naaxhuiñyjäy ajcxy ypocy

¹⁸ Copicy nbaatim tudägy'ajtin ma Dios, com je Dios huidibi tzinaayb tzajpjoty ti xyajnejhuüiyim co yi' tzaachytuna'ñ mictägy tüg'óciy jäy ajcxy huidibi midundigooyb yi' ytiy'ajt, tüg'óciy huidijaty jibic huinma'ñ ymiid, tüg'óciy yi' ajcxy huidibi yajtigooyb

Dios ytiy'ajt miid je jibicpi huidibi ajcxy ytumyib. ¹⁹ Com yi jäy ajcxy huidibi jibicjot jibic-huinma'ñ miid, y'ijxpy ñejhuiyb ajcxy Dios ytiy'ajt, com Dios ti pidägy yi' ytiy'ajt ma yi' ajcxy yjot yhuinma'ñ. ²⁰ Ñejhuiyb jäy ajcxy Dios ytiy'ajt, com mabaad oga'n Dios yajcojy naaxhuiñybi ixti chambaad, quëxïcp ya naaxhuiñ Dios ymic'ajt y'ijxpejt, oy ca' pin Dios ixy, huidibi Dios ti cojy ti macxy yejcpy ijxpejt co Dios yjijity, etz Dios ymic'ajt huinixii huinitiempo ijtp yi', ca' ycixipy ytigoyipy nimina. Co anajty Dios tzaachytuna'ñ yi pocyjäy ajcxy, ca' ajcxy ni ti ayuc miid huaad adzohuimbidi Dios miid ajcxy ypocy ycixpi. ²¹ Com ñejhuiyb ajcxy co ji Dios yajpaady, e ca' ajcxy ojadajtcixy ca' ajcxy huindzigüygixy Dios. E nañ ni ca' ajcxy yajnaxy Dioscojuyip ma Dios. E nañ jadu'n ajcxy ñaybidáacigixy amij agix, yhuinma'ñ ixtaaygixy huidibi ca' ytiy'ajity. Yajtigooyi ajcxy Dios ytiy'ajt ma ajcxy yjot yhuinma'ñ, e nañ miid'ajtcixy tzuuhuinma'ñ. ²² Yi jadu'mbi jäy ajcxy hue' yhuinma'ñ pidaaccixy co ajcxy ooy ycohuinma'ñity, co ajcxy ooy y'ixpicyity, e ca' yjanchity, tzuu huinma'ñ ajcxy ymiid. ²³ Ma yjapadyii ojadajtcixipy huindzigüygixipy Dios huidibi ymic'ajtin y'oy'ajtin ca' ycixipy ytigoyipy nimina. Chi ajcxy yajtigach yjot yhuinma'ñ, e huindzigüygixy jäy y'ahuinax e jäy ajcxy yjugy'ajtin etz y'oy'ajtin cixaamb tigoyaamb. Ixti mijpidaaccixy nañ jadu'n joon y'ahuinax, iyujc y'ahuinax etz tza'ñ y'ahuinax.

²⁴ Co jäy ajcxy jadu'n ytundigoy, paady Dios ñajtz'ixiiyin ajcxy, huen tundigooygixy nej anajty ci'm jibichuinma'ñ nijot'ajtcixy. Ñaymidundigóoyigixy ñinïcx miñ xyipy huidibi janch oy midzo'yduuni. ²⁵ Ma yjapadyii ixipy mijpidaaccixy je tiy'ajt tiydudägyipi nej Dios ti yecy, huin'it ajcxy mijpidaaccixy anii huidijaty jäy ti

cojy ti macxy. Ma yjapadyii ixyipy huindzigiiygixy Dios, huidibi ci'm ti yajcojtäy tüg'óciy tijaty ji yajpaatp, huin'it ajcxy huindzigiiygixy jäy y'ahuinax joon y'ahuinax, etz iyujc y'ahuinax huidijaty ca' ti mic'ajt miidity. Copicy n'ojadajtim ngömaayim Dios huinixii huinitiempo. Amén.

²⁶ Miid co jäy ajcxy tzachhuindzigiiygixy jäy y'ahuinax etz jactijaty ahuinax, paady ycixpi Dios ajcxy ñajtz'ixiiyi, chi ajcxy tungixy yi jibic-huinma'ñ huidibi ci'm ñijot'ajtcixyp huidibi oy ymidzo'yduuni. Töxyjäy ajcxy ma yjapadyii chináaygixipy tudägy miid ñäy, chi ajcxy ñaymiiddtináayigixy e ñaymiiddtundigóoyigixy actöxyjäydijc. ²⁷ Yëydijctijc ajcxy nañ jadu'n ñaymiiddtundigóoyigixy miñ xyipy. Ñaymiiddzináayigixy ma yjapadyii ixyipy chinaaygixy miid töxyjäy ajcxy, huin'it ytundigooygixy ma Dios ytiy'ajt. Ci'm nijot'ajtcixy jibic-huinma'ñ huidibi oymidzo'yduuni, ypátcixipy ma ajcxy ñinicx je tzaachypí huidibi Dios ypidacpy miid yi' ajcxy ypocy ycixpi.

²⁸ Co yi jäy ajcxy jadu'n ci'm yhuinma'ñ ti pidaaccixy co ca' yajmij'ada'ñ Dios, paady ycixpi Dios ñajtz'ixiiyi ajcxy. Huen tim tungixy huidibi ajcxy ci'm ñijot'ajtpy, huidibi Dios ca' jäygidägy. ²⁹ Jäy ajcxy ooy mij jibic-huinma'ñ canaagnax nijot'ajtcixy; yëydijctijc ooy ajcxy jibic-huinma'ñ tungixy; ooy ajcxy migapxtigoy töxyjäy ajcxy; ooy ajcxy adzojccixy comeen'ajtin; ooy mi'ijxtinaaygixy ymigügtijc; ca' ajcxy ymigüg ixaangixy; ooy ajcxy yjäyyaj'öccixy; ooy ajcxy chiptunaangixy; ca' ajcxy ycapxymidohuaangixy; ooy ajcxy ymigüg huin'ingixy; ooy ajcxy ypiitcapxcixy; ca'p ajcxy ymigüg ixaangixy. ³⁰ Jäy ajcxy ooy nigapxy ni'ojjy ymigügtijc; ca' ajcxy ixaangixy Dios; ca' ti jäygidaccixy; ooy ajcxy amij agix ñayjihuiiyigixy; ooy ajcxy ci'm

ñaygömäayigixy; ooy ajcxy cojy macxy jibic-huinma'ñ, ca' ajcxy capxymidoogixy ytaj yteedy. ³¹ Jäy ajcxy ca' y'ayuc-huinjihuiiygixy; ca' ajcxy cuydungixy yci'm'ayuc; ca' ajcxy ni pin tzojccixy jihuiiygixy; ca' ajcxy ni pin pa'ayoogixy. ³² Jadayaabi jäy ajcxy ñejhuiiyb co Dios ti cojy ti macxy ycötujcin co pinjaty tundigooyb jadu'n miid Dios ytiy'ajt, tigooyip ajcxy yjugy'ajtin. Oy ixyipy yi jäy ajcxy janejhuiiygixy co padaangixy y'o'cin, huin'it ajcxy jactimtungixy jibic-huinma'ñ, e nañ jadu'n jotcuyc ajcxy co jac pinjaty jibic-huinma'ñ tungixy.

2

Dios tiydumb jadu'n nej yi' tzocy

¹ Paady co miich migüg m'ix'ixy mba'ixy ti ytumyb, ti migüg ycapxyp ti anajty pocy mnaymöyii, oy ixyipy ypinjäy ñejpyjäyity. Miich ooy ti pocy m'ixy ma huing jäy, e nañ jadu'n miich ooy mij mdundigoy, tim jadu'n nej yi' ajcxy ytundigooygixy. ² Nejhuiiyim co Dios tudägy ytuñ co tzaachytuñ tüg'óciy pinjaty tundigooyb. ³ E miich co migüg m'ix'ixy mba'ixy ti ytumyb ti migüg ycapxyp, nañ jadu'n miich Dios xychaachtuna'ñ. ¿Nej mdijy mdzögip co anajty Dios xytiyduna'ñ? ⁴ ¿Nej ca' mjäygidägy nej Dios mij ooy may'ajt oy'ajt ti tuñ miid miich, nej ooy mij ti xypa'ayoy, mij ti xymimecxtucy? ¿Nej ca' mnejhuiiy co Dios mij ooy xypa'ayoy xymimecxtucy, jigix mjothuimbidity nej mdundigoy ma Dios ytiy'ajt? ⁵ Miid co ooy mjotjuuñity mgöjuuñity, ca' ajcxy mjothuimbida'ñ, ca' ajcxy m'ixmadza'ñ nej ajcxy mdundigooygixy. Paady ycixpi Dios huidibi tudägy tumb nigü miich yi' ooy mij xychaachtuna'ñ co anajty xi tiempo ycixy ytigoy, e Dios chaachtunamyb jäy ajcxy miid ypocy ycixpi. ⁶ Co anajty Dios tiyduñ yi naaxhuiñ jäy, chi yajnidagihua'ñ nidüg nidüg nej anajty ti chinäy.

⁷ Nijëjity jäy ajcxy oyjot oyhuinma'ñ tungixy jabom jabom, yjijp'ijxpy ajcxy co Dios oybi ymöhuaanigixy, nañ yjijp'ijxpy ajcxy co Dios ycömayiib, yjijp'ijxyp ajcxy yjugy'ajtín huidibi ca' ycixipy ytigoyipy nimina. Yi jadu'mbi jäy Dios ymöhuaamyb jugy'ajtín huidibi ca' ycixipy ytigoyipy nimina. ⁸ Per Dios chaachytunamyb mijcajee yi jäy ajcxy huidibi ca' ycapxymidohuaangixy, huidibi ca' cuydungixy Dios ytiy'ajt, huidibi ajcxy tumb jibic-huinma'ñ. ⁹ Ayo'n tzaachypi ypadamyb tüg'óciy jäy ajcxy huidibi jibic-huinma'ñ ti tuñ. Nañ jadu'n miich judíojäy ajcxy tim jayijp mbadaangixy tzaachypi, pen mdundigooygixp, e chiini yi jacjadyii jäy padaangixy tzaachypi, pen tundigooygixp. ¹⁰ Tüg'óciy pinjaty oyjot oyhuinma'ñ tungixp, Dios ymöhuaamyb yi' ajcxy oy'ajtín, nañ cömayaanip yi' ajcxy Dios, etz nañ yajjotcugihuiib ajcxy. Tim jayijp yi judíojäy pada'ñ ajcxy oybi, etz jac'axam yi jacjadyii jäy ajcxy.

¹¹ Dios ca' tiyduna'ñ jäy ajcxy huin'ijxpety, quipxy-jaty tiyduna'ñ nidüg'óciy jäy ajcxy. ¹² Nidüg'óciy jäy ajcxy huidibi tundigooygixp, Dios yajtigoyaanip ajcxy yjugy'ajtín. Yi jäy ajcxy huidibi ca' miidity Dios ycötujcín huidibi cojaayip, Dios yajpocycähuaanip ajcxy, com ymiid ajcxy Dios ytiy'ajt ma yjot yhuinma'ñ. Yi jäy ajcxy huidibi miid Dios ycötujcín cojay, Dios yajpocycähuaanip ajcxy miid yi' ycötujcín huidibi cojaayip. ¹³ Yi jäy ajcxy huidibi niigoob amido'ijtp co yajcapxy Dios ycötujcín, e ca' ycapxymidoogixy, ca' ycöbiga'ñyii Dios jadu'n nej jihuüy ytudägyjäyity. Yi jäy ajcxy huidibi capxymidoob Dios ycötujcín, Dios cöbigaanip co ajcxy ytudägyjäyity. ¹⁴ Yi jäy ajcxy huidibi ca' miidity Dios ycötujcín huidibi cojayip, co ajcxy nijot'ajtcixy oyjot oyhuinma'ñ jadu'n nej Dios tzocy, jadu'n nipaady nej jihuüy ajcxy miidity Dios ycötujcín. ¹⁵ Co je jäy ajcxy oyjot oyhuinma'ñ tungixy,

huin'it yajnuëxëccixy co ajcxy ymiid Dios ycötujcïn ma ajcxy yjot yhuinma'ñ. E co paatcixy jibic jot jibic-huinma'ñ, huin'it jibic ñayjihuiiyigixy. E co patcixy oyjot oyhuinma'ñ, huin'it ooy oy ñayjihuiiyigixy. ¹⁶Jada je'du'n je jemybi oybi ayuc huidibi ngapxhuäcxypich co miinip je xii je tiempo co Jesucristo, miid Dios ycötujcïn, tiydunip tüg'óciy jäy ajcxy nej anajty yjot yhuinma'ñ ajcxy miidity, tüg'óciy pinjaty ti tuñ ayüch ameech tijaty.

Je Dios ycötujcïn huidibi Moisés yjay jecy'ajty

¹⁷ Miich ajcxy huidibi minamb co mjudíojäyity, miich ajcxy mmijpidaaccixyp Dios ycötujcïn, je jecyip huidibi jaybetyip. Miich ajcxy mnaygömáayigixy co miich ajcxy Dios xyjäy'adyii. ¹⁸ Miich ajcxy mnejhuiiyb nej Dios tzocy nej huaad mjäy'ajtcixy. E nañ ti m'ixpicy Dios ycötujcïn huidibi ti xyajnejhuiiygixy huidibi tiy'ajt jac'oyip. ¹⁹ Miich ajcxy minamb co janch janch co miich ajcxy Dios ytiy'ajt myejci ma yi jäy ajcxy huidibi ca' Dios ytiy'ajt miidity, jadu'n nipaady nej jihuiy tüg huintzpi mhuijtyöy, e nañ jadu'n nipaady nej jihuiy mgodixy je jäy ajcxy huidibi agootztuum tzinaayb. ²⁰ Miich ajcxy judíojäy myaj'ixpijcpy yi jäy ajcxy huidibi ayoob, huidibi ca' ti tiy'ajt nejhuiiygixy, e mgapxhuijy yi jäy ajcxy huidibi ca' yhuinma'ñymejtcixy. Miich ajcxy minamb co m'ayuc etz mdiy'ajt mbaatcixy ma Dios ycötujcïn huidibi jaybetyip. ²¹ Miich ajcxy myaj'ixpijcpy jacjadyii jäy ajcxy Dios ytiy'ajt. ¿Nej co ca' ci'm mguydungixy nej ti myaj'ixpijccixy? Myaj'ixpijcpy ajcxy jacjadyii jäy co ca' huaad ymeetzcixy, e miich ci'm ajcxy meetzp. ²² Miich ajcxy myaj'ixpijcpy jacjadyii jäy co ca' huaad migapxtigoy töxyjäy ajcxy, e ¿miich ajcxy nej co mmigapxtigooygixy töxyjäy ajcxy? Miich ajcxy ci'm minamb co ca' huaad jajhuindzigiy tzaaboch quipychech, e miich ajcxy ci'm

mdzachmeech je meeñ ma je tzajptijc ma je quipychech y'ity. ²³ Miich ajcxy mdzachnaygömäayigixy co mguydungixy Dios ycötujcín. Miich ajcxy m'ixtijy Dios miid co ca' ajcxy mguyduni yi' ytiy'ajt. ²⁴ Paady jadu'n jaybety miiñ ma Dios ñecy, ma jadu'n ymína'ñ: “Com co miich ajcxy mdundigooygixy, paady ycixpi yi jacjadyii jäy ajcxy nigapxy ni'ojij Dios yxii.”

²⁵ Co ajcxy mguyduunip Dios ycötujcín, huin'it Dios xytunipcuendi co miich ajcxy miidity je tiy'ajt ma mninícx co Dios xyjäy'adyii. Co ca' ajcxy mguyduunip Dios ycötujcín, huin'it Dios ca' xytunipcuendi co miich miidity je tiy'ajt ma mninícx co Dios xyjäy'adyii. Jadu'n nipaady nej jihuüy ca' mdiy'ajttiyity. ²⁶ Co yi jacjadyii jäy ajcxy huidibi ca' miidity tiy'ajt ma ñinícx, e cuyduni ajcxy Dios ytiy'ajt, jadu'n nej ajcxy ytiy'ajttiyity. ²⁷ Yi jacjadyii jäy co ajcxy cuyduñ Dios ytiy'ajt, yi' ajcxy capxpaady'idipy ma Dios. E miich ajcxy judíojäy mbocycáhuip miich ajcxy, oy miich ajcxy mjamiidity ixypy Dios ycötújcín huidi cojaayip, pen ca' mguydungixy. ²⁸ Je iixpejt janchypí co pinjaty Dios yjäy'ajtyp, canan je' je iixpejt huidibi ymiid ma ninícx. E nañ jadu'n canan je' je tiy'ajttihuüi cötujcín huidibi jäy cuydun jecy'ajty. ²⁹ Je iixpejt janchypí co pinjaty Dios yjäy'ajtyp, je' je' je iixpejt huidibi ymiid ma yjot yhuinma'ñ, je oyjot oyhuinma'ñ huidibi ymiid, je iixpejt co je Espíritu Santo ti yajhuächyüi yjot yhuinma'ñ, canan je' je tiy'ajt co ti cuyduñ je jecyip cötujcín huidibi cojay ijtp. Yi jadu'mbi jäy ajcxy cömay'idipy ma Dios, e ca' ycömay'ida'ñ ma jäy ajcxy.

3

¹ Pen tiy'ajt jadu'n nej nmína'ñich, ¿ti jäygidaacin yi judíojäy ajcxy ymiid ma Dios huidibi yi jacjadyii jäy ajcxy ca' miidity? ¿Ti jäygidaacin ajcxy ypatpy co ajcxy miidity

tiy'ajt ma ñinix co Dios yjáy'adyii? ² Yi judíoájäy ooy canaagnax oy'ajtin jamiidity. Tim jayijp Dios yajñibijci ajcxy yi' ycötujcin yi' y'ayuc huidibi cojaayip. ³ ¿Nej mdijy co Dios ca' cuyduna'ñ yi' y'ayuc miid yi' judíoájäy ajcxy miid co nijējity judíoájäy ca' cuyduñ yi' ycötujcin? ⁴ Dios ca' jadu'n huinma'ñ miidity nej jāy ajcxy huinma'ñ miidity. Oy ixipy nidüg'óciy jāy y'anidaaccixy, Dios ca' y'anidäga'ñ nimina. Paady jadu'n jaybety miiñ ma Dios y'ayuc co David jadu'n yminañ:

Ñejhuñhuipy jāy ajcxy co miich, Huindzin Dios, tudägy mguyduñ yi' m'ayuc. Ca' huaad pinjaty ymina'nip co ca' miich mguyduñ yi' m'ayuc.

⁵ Pen Dios cōmaybidzimipy miid ajt nbocy ycixpi, ¿nej tiy'ajt jadu'n nej jāy yminaangixy co Dios ca' oy ytuñ, co xychaachytuunim miid ajt nbocy ycixpi? ⁶ Ca' yjadu'nity. Co ixipy yjadu'nity, Dios ca' yi' tiydunipy naaxhuiñyājy miid ajcxy ypocy ycixpi.

⁷ Co ixipy ytiy'ajtity jadu'n nej jāy yminaangixy co Dios ooy yjotcujcity co ca' xychaachytunipyich miid nbocyich ycixpi, jac'oy co ixipy ndundigooyich, jigix Dios janch ycōmaybidzimipy. ⁸ Jac'oy ixipy nminaanim: “Tzoc tundigooyim jigix jēbi Dios cōmay ypidzimipy.” Ixti nijējity jāy ti xyñihuambetyich co iich jadu'n ti nmīna'ñich. Ca' jadu'n nmīna'ñich co Dios jāy tzaachytunipy ninigoob. Dios chaachytunipy pocyjāy ajcxy, com paatip ajcxy jadu'n yi' tzaachypi.

Nidüg'óciy iich ajt nbocymiidity

⁹ ¿Nej janch jadu'n co iich ajcxy huidibi judíoájäy, jac'oyjāy iich ajcxy ca'ydi yi' jacjadyii jāy ajcxy? Ca' yjadu'nity, ca' iich ajcxy njac'oyjāyity. Com ti jayijp nyaj'ixpicyich co tüg'óciy jāy ajcxy yajpaady pocymiid, yi'

judíojäy, etz nañ jadu'n jacjadyii jäy ajcxy. ¹⁰ Com jadu'n jaybety miñ ma Dios ñecy ma jadu'n ymına'ñ:

Ca' ji ni tüg jäy tudäcxy, ni tüg.

¹¹ Ca' ji ni pin huidibi huiñjihuñy Dios ytiy'ajt. Ni pin huidibi ixtaayb Dios ytiy'ajt.

¹² Nidüg'óciy jäy ti ixmajtzcixy Dios ytiy'ajt. Quipxy ycapxy ajcxy ytumyb co ytundigooygixy. Ca' ji ni pin, pin huädz oy yjot oy yhuinma'ñ tumb, ca' ji ni tüg.

¹³ Yi jäy ajcxy ooy ycapxtigooygixy, oy ajcxy yhuin'ññ miid y'ayuc. Jadu'n ajcxy yöcpajc nipaady nej tüg öcpi jut huidibi ahuädz. Ooy ajcxy yajtzachiy miid y'ayuc jadu'n nej jihuñy tza'ñ chüch.

¹⁴ Ooy ajcxy ycapxtigooygixy. Ooy ajcxy jibic ayuc capxcixy.

¹⁵ Miid yinjaty huenjatypi ayuc, mic'amy ymügüg yaj'o'ccixy.

¹⁶ Ma ajcxy yhuidity ooy midundigooygixy ymügüg, e nañ yecy ajcxy tajin mayin.

¹⁷ Ca' ajcxy nejhuñyixy nej huaad chinaaygixy jotcujc, ca' ma ti tzip ti capxy.

¹⁸ Ni cahuinmaaygixy nej Dios tzigñyixy.

¹⁹ Tüg'óciy ayuc ycojaayity ma Dios ycötujcin necy, mic'ajt miidpi miid yi jäy ajcxy huidibi yajmij'ajtp je cötujcin. Dios ti pidägy yi' ycötujcin, jaydëbi pinjaty tundigooyb, huaad ca' ti anñ tuñ ma Dios. Dios ytiydunipy tüg'óciy jäy ajcxy miid yi' ycötujcin. ²⁰ Dios ca' capx-pada'ñ co ytudägyity, miid co ti cuydunyii ycötujcin. Dios ti pidägy ycötujcin jaydëbi nejhuñyim co ajt nbo-cymiidity.

Yi alma nüdzoocin, hue' yajpaady miid mibijcin

²¹ Jadachambi Dios xyajnejhuñyim jemybi tiy'ajt jadu'n nej tudägy'ajtin jëb nbaatim ma yi', e jada jemybi

tudägy'ajtin tiy'ajt, ca' yi' yjadu'nity nej yi tiy'ajt huidibi yajpatp ma Dios ycötujcin jecy'ajtpyi. Per yi Dios y'ayucnajtzcapxiybi ñecy etz Dios ycötujcin necy yejc tiy'ajt jecy'ajty co Dios xymöhuaanim tudägy'ajtin. ²² Jadu'n Dios yaj'ahuimbidaangixy tudägy tüg'óciy jäy huidibi mibijcp Jesucristo, ca' ñejity pinjäy ajcxy, pen judíojäy o pen ca' judíojäy ajcxy. ²³ Com nidüg'óciy naaxhuiñjäy ti ytundiгоoыgixy. Ni tüg jäy yhuädz'ajtin ycanaybadyii miid Dios yhuädz'ajtin y'oy'ajtin. ²⁴ (Miid co nidüg'óciy jäy ytundiгоoыgixy), paady ycixpi Dios mijmay'ajt mij'oy'ajt tuñ ninigoob miid tüg'óciy jäy ajcxy, e Jesucristo ti cojuydäy tüg'óciy ajcxy ypocy, e jadu'n yaj'ahuimbity tudägy nidüg'óciy jäy ajcxy huidijaty mibijccixp Jesucristo. ²⁵ Dios yquejx y'ung ya naaxhuiñ, jaydëbi huinmeecxip jäy ajcxy ypocy, miid co Jesucristo ti y'ögy miid ajcxy ypocy ycixpi. Dios yhuinmeecxip jäy ajcxy ypocy co ajcxy mibigipy Jesucristo. Jayijp ca'ni anajty Jesucristo miin ya naaxhuiñ, Dios ooy mimecxtujcy jäy ajcxy, ca' anajty miidity jotcöduuyb jäy ajcxy ypocy. ²⁶ Jadachambi xii tiempo Dios ti yaj'oyiy jadu'n nej jëb huinmeecxipy jäy ajcxy ypocy, e jadu'n yaj'ahuimbidity ajcxy tudägy ma yi' yhuinduu. Jadu'n Dios tuñ jigix ñiguëxigipy co Dios tudägy yi', e tudägy'adaamni yi', co cöbicy jäy, yi pinjaty mibijcp Jesucristo.

²⁷ ¿Ti huaad jäy ajcxy tungixy huidibi jëbi miid ñaygömayiyb ma Dios? Ca' ni ti. ¿Na'amy co yjadu'nity? ¿Nej jëbi ajcxy ñaygömayiyb miid co yajmij'ajtcixy Dios ycötujcin? Ca' yjadu'nity. Ca' huaad ñaygömáyigixy ci'm, com Dios ti yaj'ahuimbity jäy ajcxy tudägy huidibi mijpidacp Jesús. ²⁸ Paady nmına'ñich co jäy ajcxy y'ahuimbity tudägy co ajcxy mibicy Jesucristo, e canan co janch ypaad jacuydungixy canaag cötujcin.

²⁹ ¿Nej miich ajcxy mdijcixy Dios ytuñ miid ac yi'yi judío'jáy ajcxy, e ca' jacmiid pinjaty? Ca' yjadu'nity. Dios tuumb miid janch nidüg'óciy jáy ajcxy. ³⁰ Ji tügpajc Dios, e yi' tú'ciy ytuñ miid judío'jáy, etz nañ jadu'n jac-jadyii jáy ajcxy. Dios yaj'ahuimbijtaayb tudägy nidüg'óciy jáy ajcxy co ajcxy mibijccixy Jesucristo. ³¹ Co jadu'n nbaatim ndudägy'ajtin miid co nmibijcim Jesucristo, ca' nminaanim Dios anajty yi' ycötujcin je jecyip nya-jödigooyim. Hue' janchtiy nigí anajty nmic'ajtmooyim Dios ycötujcin.

4

Je ijxpejt huidi Abraham yejc

¹ ¿Nej n'ocminaanim? ¿Ti oybi ti paady ma Dios je Abraham iich ajt nmij'ap nmijteedy? ² Co ixypy Dios Abraham tudägy ti ixy, miid co oybi ti tuñ, jébi Abraham ixypy ñaygömayii. Per ca' huaad ci'm ñaygömayii ma Dios. ³ Jadu'n jaybety ymiñ ma Dios ñecy ma jadu'n ymina'ñ: “Abraham ymijpidaaci Dios, e paady Dios jadu'n cöbijcy Abraham jadu'n nej tüg tudägyjáy.” ⁴ Je jáy huidibi ymuju'ñ patp miid ytung ycixpi, jada meñ huidibi ymuju'ñ'ajtpy ca' nigoo ñimöyii, hue' tim paatip jadu'n miid ytung ycixpi. ⁵ Yi jáy huidibi ca' jip'ixy co tudägy'ajtin pada'ñ ma Dios miid oy'ajtin ycixpi huidibi ytumyb, jéyi ymibijcipy ymijpidacpy co Dios yaj'ahuimbida'ñyii tudägy. Yi jadu'mbi jáy tudägy'ajtin ypadamy miid ymibijcin ycixpi. ⁶ Jaybety ymiñ ma Dios ñecy co je David jecy'ajty nimiydacy tüg jáy huidibi ooy anajty jotcujc ñayjihuiyii miid co Dios ti y'ixyii jadu'n nej jihuiy ytudägyjayity miid ymibijcin ycixpi, e ca' nminaanim miid oyjáy'ajtin ycixpi huidibi ytumyb. ⁷ David jadu'n yminañ:

Jotcujc je jäy ajcxy huiidibi ypocy ti yhuinmecxyii, huiidibi ypocy ti yajtigoyii.

⁸ Jotcujc je jäy huiidibi Dios cöbijcip jadu'n nej jihuüy ca' ypocy ymiidity.

⁹ ¿Nej janch tiy'ajt jadu'n co jada jotcujc'ajtin huiidibi David ñimiydac jecy'ajty, co ac yi judíojäy yi' ajcxy padaamb huiidijaty miid tiy'ajt ma ñinicx co Dios yjäy'adyii? Ca' yjadu'nity, yi jacjadyii jäy nañ jadu'n yi' ajcxy padañ jotcujc'ajtin. Ti nmináangixyich co Abraham ymibijci Dios, e Dios ycöbijci jadu'n nej jihuüy ytudägyity. ¹⁰ ¿Nej mdiy Dios ycöbijci Abraham jayijp ca' anajty yajtiy'ajttiñi? o ¿ti anajty yajtiy'ajtti? Dios ycöbijc Abraham jadu'n nej jihuüy ytudägyjäyity ca'ni anajty pidacy tiy'ajt ma ñinicx co Dios yjäy'adyii.

¹¹ Jayijp anajty Abraham ti mibicy Dios, e ti anajty Dios ycöbigyii. Jac'axam Dios Abraham je cötujcin mooy co huen tiy'ajttiñihipy y'ung etz y'ap y'oc. Je' je' ijxpejt'ajtp co Dios anajty jayijp ti ycöbigyii jadu'n nej jihuüy ytudägyjäyity, ca'ni anajty ymöyii cötujcin. Co Dios jadu'n ytuñ miid Abraham jadu'n nipaady nej jihuüy Abraham nmijteedy'ajtim ich ajt nidüg'óciy huiidibi cham mibijcp Jesús. ¹² Abraham nañ jadu'n ñimijteedy'ajtyp yi judíojäy huiidibi mibijcp mijpidacp Dios tim jadu'n nej yi' mibicy anajty Dios, jayijp ca'ni anajty miidity tiy'ajt ma ñinicx co Dios yjäy'adyii. Jadu'n nipaady nej jihuüy Abraham ca' nimijteedy'aty yi judíojäy huiidibi ca' mibicy Dios.

Je huiidibi Dios ti xyaj'ahuaniyim ti ycixy yca'px miid je mibijcin

¹³ Miid co Abraham etz y'ap y'oc ymibijcypy ymijpidacpy anajty ajcxy Dios, e paady anajty Dios yaj'ahuimbidaánigixy tudägy, e paady Dios nimay

Abraham co yi naaxhuiñybi yi' ajcxy je' adaanip. Canan jadu'n ajcxy Dios ñimayi co ymôhuaaniḡixy je naaxhuiñybi miid co anajty nidüg'óciy ajcxy ti cuydungixy Dios ycötujcin. ¹⁴ Co Abraham etz y'ap y'oc padaangixy je naaxhuiñybi huidibi yaj'ahuaniñyi, miid co ajcxy ti cuydundaayi Dios ycötujcin, paady naadig'i'ajtp ixypy co nmibijcin co Dios xyaj'ahuimbidaanım tudägy. E nañ naadig'i'ajtp ixypy co Dios je Abraham ñimay: "Je naaxhuiñybi miich je' mje'adaanip, com ti xymibicyich." ¹⁵ Je pinjaty mijpidaacp Dios ycötujcin je jecyıp, Dios yi' tzaachytunaanip, com ca' cuydundaaygixy. Pinjaty ca' miidıty Dios ycötujcin huidibi jaybetyıp, ca' yi' midundigooygixy jadayaabi cötujcin.

¹⁶ Miid co Abraham anajty Dios ti mibicy, paady ycixpi Dios ñimaayi co je naaxhuiñybi yi' je'adaanip. Jadu'n Dios may'ajt tuñ miid Abraham, jaydëbi tüg'óciy pinjaty mibijcp Dios, tim jadu'n nej Abraham mibijcy Dios, jëbi ajcxy paatcixy yi' oy'ajtin huidibi Dios yajnimay Abraham co möhua'ñ je oy'ajtin huidibi yegamyb ninigoobi. Dios ycuydunamyb yi' y'ayuc miid tüg'óciy jäy huidibi mibijcp Dios, tim jadu'n nej Abraham anajty mibicy Dios, canan yí'yi judíojäy ajcxy padam oy'ajtin, com Abraham ijxpejt yejc ma tüg'óciy jäy ajcxy. ¹⁷ Ma Dios yhuinduu jadu'n nipaady nej jihuñy Abraham iich ajt nmij'ap'ajtim nmijteedy'ajtim nidüg'óciy huidibi mibijcp Dios, com Abraham nañ jadu'n ymibijcpy anajty Dios. Com jadu'n jaybety ymiin ma Dios ñecy co Dios jecy'ajty jadu'n ñimay Abraham: "Hich miich nyajniñbijcpy co miich mnimij'ap'adamyb mnimijteedy'adamyb tüg'óciy je mayjäy huindu'mybi naax huindu'mybi cajp." E Dios ycuydunıpy yi' y'ayuc com mic'ajt miid, ixti jaydëbi yajjugypigıpy jadüg'oc jäy tiibi y'ó'ccixy. E nañ mic'ajt

müid jaydëbi ane'min pidägy co huen yjii'adipy huidijaty ca' ca'tni.

¹⁸ Müid co Dios anajty ti ñimäyii co ymüid'adamyb may y'ap y'oc, paady ycixpi Abraham ti jijp'ixy anajty co Sara anajty y'ung'ixa'ñ. Canaag jimijt anajty jajijp'ixy co huen y'ung paadip. Ti anajty tiempo ñajxni mina y'ung'ixipy. Hue' Abraham ymibijc huidibi anajty Dios ti yajnimäyii co yi' müid'idamyb may'amy y'ap y'oc. Paady ti ni'ap'aty ti nideedy'aty may'amy y'ap y'oc. ¹⁹ Abraham ti anajty ymic'ajt ycixni com ti anajty ymijäyiyñi. Ymüid anajty migo'px jimijt, e nañ yi' ytöxyijc Sara ni tüg anajty ti yca'ung'ixy, per Abraham yjacmibijcyp anajty co Dios cuyduna'ñ y'ayuc müid yi'. ²⁰ Abraham ca' anajty ixmach yi ymibijcin jadu'n nej anajty Dios ymüidity ymic'ajt jaydëbi cuydunip yi'y'ayuc. Chi Abraham ibaty capxpaty Dios. ²¹ Com Abraham ti anajty huinma'ñ ypidägy ma Dios co yi' ymüid ymic'ajt jaydëbi ycuyduniyib yi' y'ayuc huidibi yaj'ahuaniy. ²² Com Abraham ymijpidaacip anajty Dios y'ayuc, paady Dios anajty ti cöbicy Abraham, e jadu'n anajty ti yajnaxy nej jihuüy ytudägyjäyity.

²³ Dios ymoy Abraham jada y'ayuc huidibi jaybety, canan jëda'ajty Abraham yajmoy, nañ yajmoyday mayjäy. ²⁴ Nañ jadu'n jaybety miñ jada ayuc müid ich ajt ycixpi. Dios nañ xycöbigaanim jadu'n nej jihuüy ajt ndudägyjäyity müid co nmibijcim Dios huidibi ti yajjugypijcy anajty jadüg'oc ajt nHuindzin Jesucristo. ²⁵ Dios yciyejc Jesús huen yaj'ögyii müid ajt nbocy ycixpi. E nañ Dios yajjugypijc Jesús jadüg'oc jaydëbi xyaj'ahuimbijtim tudägy ma Dios.

Je nej yhuimbizimni co Dios xycöbijcim tudägyjäy

5

¹ Müid co nmibijcim nmijpidaacim ajt nHuindzin

Jesucristo, paady Dios ti xyaj'ahuimbijtim tudägy. E miid co Dios ti xyaj'ahuimbijtim tudägy, paady jotcujc n'ijtim miid Dios. ² Co nmibijcim nmijpidaacim Cristo, chi nbaatim je may'ajt je oy'ajt huidibi Dios ytumyb miid ich ajt, e jadu'n oy n'ijtim miid Dios, ca' ma ti tzip. Nañ ooy njotcugiyim, miid co njjip'ijxim co nbadaanim Dios y'oy'ajtin. ³ Canan jëda'ajty nmijotcujc'ajtim co nbadaanim Dios y'oy'ajtin, nañ jadu'n tzoc mijotcujc'ajtim ayo'n tzaachypi. Com nejhuiiyim co nminajxim nyajnajxim tzaachypi, huin'it jëbi nyajtunim mecxtujcin. ⁴ E co nyajtunim mecxtujcin, cömay najxim ma Dios, e co anajty cömay ti nnajxim, chi njjip'ijxim co nbadaanim oy'ajtin ma Dios. ⁵ Com njjip'ijxim co nbadaanim Dios y'oy'ajtin, chi ca' ndajim nmayim com Dios ti yi' yEspiritu Santo xy'adigiyyim xyjottigiyyim huidibi xyajnejhuiiyim jadu'n nej Dios xychojcm xyjihuiiyim.

⁶ Jecy'ajty co anajty ca'ni Jesucristo ymiñ, je naaxhuiñyäjy ca' anajty mic'ajt miidity nej ci'm y'ahuimbijtcixipy tudägy. Co yhuaad'ajtni je xii je tiempo huidibi Dios ti yaj'ixtägy, huin'it Cristo y'o'cy miid ich ajt nbocy ycixpi miid co ndigooyim miid Dios ytiy'ajt. ⁷ Co ixipy n'ijxtaayim pinjaty codinähuiip tüg jäy tudägyipi ma yi o'cin, ca' ni pin nbaatim. Co ixipy n'ijxtaayim pinjaty codinähuaamyb tüg jäy huidibi ooy ycömayity ma yi o'cin, ca' yjecyity co nbaatim tüg metz. ⁸ Per Dios yajniquëxícyp jadu'n nej xychojcm xyjihuiiyim mijcajee co quejxy Cristo huen o'cy miid ajt nbocy ycixpi, oy anajty ich ajt ooy njacpocytuunim. ⁹ Cristo ti xyaj'ahuimbijtim tudägy co ñi'py ti temy ti yocy miid ajt nbocy ycixpi, e nañ Cristo niği may'ajt tuna'ñ miid ich ajt ycixpi co anajty xyajnidzögaanim ajt n'alma, jadu'n nej Dios tzaachytuna'ñ naaxhuiñyäjy miid ajcxy ypocy

ycixpi. ¹⁰ Co anajty ca' Cristo ymiiñi ya naaxhuiñ, huin'it anajty nmidzip'ajtim Dios. Je tzip capxy ti Dios yaj'oyi y co quejxy y'ung ya naaxhuiñ, e y'o'cy miid ajt nbocy ycixpi. Miid co Cristo xycodinaayim ma yi o'cin, paady niigi xypubejtim xypudigi yim cham co yajpaady juugy. ¹¹ Canan jada'ajty co Jesucristo xyajnidzögaanim ajt n'alma, nañ jadu'n tzoc xondaacim miid co n'ijtim miid Dios, miid je may'ajt huidibi ajt nHuindzin Jesucristo ti tuñ miid ich ajt ycixpi co yaj'oyi y je tzip nej anajty Dios nmidzip'ajtim, jebi jotcuyc n'ijtim miid Dios.

Adán etz Cristo

¹² Miid jada ycixpi co yi pocyuni chondacy jecy'ajty ya naaxhuiñ miid tügpä jäy. E co jäy ytundigooy oga'n miid Dios, paady ycixpi je o'cin ytiigi y ya naaxhuiñ. Miid co tüg'óci y jäy midundigooygixy Dios, paady tüg'óci y jäy patcixy yi o'cin. ¹³ Janch tiy'ajt jadu'n co jäy ajcxy ytundigooy jecy'ajty jayijp ca'ni anajty Dios yecy yi' ycötujcin cojaaybi, e co ca' jäy anajty ajcxy cötujcin miidity jecy'ajty, paady ca'pin tiyduñ ajcxy nej ajcxy ytundigooy. ¹⁴ Ca' ñejity, oy ajcxy anajty ca' miidity Dios ycötujcin, nañ jadu'n y'o'ctay ajcxy, chondacy miid Adán, ixti yja'ty ma Moisés yxi ytiempo. Nañ o'ctay jäy ajcxy huidibi tigachjaty tundigooy, ca' yjadu'nity nej Adán oga'n ytundigooy. Ich ajt nninix ymiid je jibicpi huidibi nbaatim ma Adán. Per ajt njemyjot njemyhuinma'ñ nbaatim ma Cristo.

¹⁵ Je pocyuni hidibi Adán yajtzondac, ca' naybadyii miid je tudägy'ajtin hidibi Dios ti xyñimooyim. Miid je pocyuni ycixpi hidibi tüg jäy ti yajtzondägy, tüg'óci y jäy öcin ti paady. Dios miid tüg yëdijc, je Jesucristo, mijmay'ajt tuñ miid jäy ajcxy ycixpi co yaj'ahuimbijtcixy tudägy, chi mayjäy tudägy'ajtin ti paady. ¹⁶ Per je

tudägy'ajtın hüidibi Dios xyñimooyım, ca' jadu'n nay-badyii miid hüidibi Adán ytuun. Miid co Adán ytundıgoy tügtecy miid Dios, paady ycıxpı mayjäy o'cin ti paady miid tüg pocy ycıxpı. Miid co Dios ti xyñimooyım tudägy'ajtın miid Jesucristo, paady mayjäy tudägy'ajtın y'oy'ajtın ti patcıxy hüidibi mibijcp Cristo. ¹⁷ Miid co tüg jäy capxycömidodacy Dios, paady tüg'óciy jäy ti patcıxy yi o'cin. Miid co tüg jäy, je Jesucristo, may'ajt oy'ajt tuñ co xyaj'ahuimbijtim tudägy, paady tüg'óciy jäy ajcxy hüidibi mibijcp Jesucristo ypadaangıxyp jotcujc'ajtın etz nañ chinähuaangıxy jilby tzajpjoty ma Jesús y'ane'my.

¹⁸ Miid co tüg jäy ytundıgoy oga'n, paady nidüg'óciy je mayjäy ypocycäy ajcxy, e patcıxy yi o'cin. Nañ tim jadu'n miid tüg jäy hüidibi ti chinäy tudägy, Dios mayjäy yaj'ahuimbijty ajcxy tudägy, e ti patcıxy yjugy'ajtın hüidibi ca' ycıxıpy ytıgoyıpy nimina xii. ¹⁹ Miid co tüg jäy capxycömidodacy Dios, paady tüg'óciy jäy ti patcıxy je pocy. Nañ miid co tügpi jäy capxymıdoy Dios, paady je mayjäy tudägy'ajtın ti patcıxy hüidibi mibijcpı Jesucristo.

²⁰ Co Dios moy jäy ajcxy yi' ycötujcin hüidibi cojaayıp, chi niği jäy ajcxy nejhuııygıxy co ypocytungıxy. Je may'ajt oy'ajt hüidibi Dios ytumyb, niği yi' y'oyıty, ca'ydi je mijpocy hüidibi jäy ajcxy ytungıxyp. ²¹ Tim jadu'n nej co jäy ypocytungıxy, huin'it ajcxy pocymiid chinaaygıxy, ixti mabaad anajty y'öccıxy miid ypocy ycıxpı. Nañ tim jadu'n co Dios may'ajt tuñ co yaj'ahuimbity jäy ajcxy tudägy, huin'it Dios ane'my yi' ajcxy chinaayın miid tudägy huinma'ñ, etz nañ xymöhuaanım jugy'ajtın hüidibi ca' ycıxıpy ytıgoyıpy nimina, co nmijpidaacım ajt nHuindzin Jesucristo hüidibi yjugy'ajtın yejc miid ajt nbocy ycıxpı.

O'cy miid yi pocy ycıxpı, jugy'aty miid Cristo ycıxpı

6

¹ ¿Nej n'ocminaanim? ¿Tzoc ooy niği tundigooyim jigix Dios niği may'ajt tunipy miid iich ajt? ² Ca' jadu'n ytiy'ajtity, ca' huaad njacpocytuunim. Co nmibijcim Jesucristo, chi jadu'n nipaady nejihuüy ti n'o'cim, e cham ca' n'ijtim pocymiid. ³ ¿Nej ca' mnejhuüygixy jada tiy'ajt? Co nniibejtim miid Jesucristo yxii, chi n'ijtim miid Jesucristo. Jadu'n nipaady nej jihuüy ti n'o'cim quipxy miid Cristo co yi' y'o'cy miid ajt nbocy ycixpi. ⁴ Co iich ajt nniibejtim jadu'n nipaady nej jihuüy ti n'o'cim, e ti nnaaxtigüiyim quipxyi miid Jesucristo. Dios Teedy miid ymic'ajtin oybi yajjugypijcy Cristo co anajty ti y'ögy, chi Cristo paty jemybi jugy'ajtin, nañ jadu'n iich ajt ti nbaatim jemybi jugy'ajtin quipxy miid yi', paady copicy ndzinaayim miid jemybi jot jemybi huinma'ñ.

⁵ Co nmibijcim Jesucristo, chi n'ijtim miid yi', co yi' ti y'ögy, jadu'n nipaady nej jihuüy ti n'o'cim quipxy miid yi'. Co Jesucristo yjugypijcy miid jemybi yjugy'ajtin, nañ jadu'n iich ajt nbaatim jemybi jugy'ajtin quipxy miid yi'. ⁶ Nejhuüiyim iich ajt nej anajty jibic-jot jibic-huinma'ñ nmiiid'ajtim jayijp'aty ca'ni anajty nmibijcim. Jadu'n nipaady nej jihuüy ajt njibicjot njibic-huinma'ñ ti y'ögy quipxy miid Cristo co yi' y'o'cy cruudzcixy. Cristo ti y'ögy miid ajt nbocy ycixpi, jigix jëbi n'ijxmajtzim pocytunii huinma'ñ, etz jigix jëbi je pocytunii ca' xyjac'ane'mim ajt njot nhuinma'ñ. ⁷ Com pinjaty ti y'ögy, yi' ypocytunii ca' ti mic'ajt jacmiidity ma yjot yhuinma'ñ. ⁸ Pen jadu'n nipaady nej jihuüy ti n'o'cim quipxy miid Cristo, paady ndzinähuaanim njugy'adaanim quipxy miid yi'. ⁹ Nejhuüiyim co Cristo ti yjugypijcy co y'o'cy, e ca' yi' y'öga'ñ jadüg'oc. Yi' o'cin ca' ti mic'ajt jacmiidity ma Jesucristo. ¹⁰ Co Cristo ti y'o'cy miid jäy ypocy ycixpi, chi

y'ögy tüg tecypajc miid nidüg'óciy jäy ajcxy ycixpi. Co Jesucristo yjugypijcy, chi tüg'óciy huídibi yi' ytumyb ma yi' chinaydac yjugy'ajttac, yi' ytumyb miid Dios ycixpi. ¹¹ Nañ jadu'n miich ajcxy mhuinma'ñypidaaccix jadu'n nej jihuıy ti m'öccixy, e yi' ypocytunii ca' ti mic'ajt jacmiidıty ma miich ajcxy mdzınaayın. E jadachambi xii tiempo tzınaaygix miid Dios ycixpi quipxy miid Jesucristo iich ajt nHuindzin.

¹² Paady ycixpi ca' huaad xy'ane'mgixy je jibic-huinma'ñ huídibi ajcxy mninıcx yjanijot'ajtpy. ¹³ Ca' huaad mgıyejccixy yi' mninıcx ma pocytunii. Naygıyéjcgix ma Dios, ixmajtzcix yi' pocytunii. Jadu'n nipaady nej jihuıy ti m'öccixy, e ti mjugypijccixy jadüg'oc. Hue' janchtiy cıyejccix yi' mninıcx ma Dios, jaydėbi mdzınaaygixıpy miid ajcxy tudägy mjot mhuinma'ñ, e cuydungix Dios chojcin. ¹⁴ Jadachambi xii tiempo ca' miich ajcxy mdzınaaygixy pocymiid, jadu'n nej jecy'ajty ajcxy mdzınaaygixy co anajty ajcxy mguydungixy Dios ycötujcin je jecyıp. Hue' janchtiy tzınaaygix miid Dios ycixpi, com Dios mij may'ajt ti tuñ miid miich ajcxy.

Tüg ijxpejt huídibi yajpatp ma n'ijtim yajtuñ

¹⁵ ¿Ti huaad nduunim? ¿Nej jėbi huaad njacpocytuunim? Com Dios mijmay'ajt ti tuñ co ti jöch ajt nbocy etz nxıhuın, e Dios ycötujcin, je jecyıp, ca' xyjacyajpocycáhuım. Ca' huaad njacpocytuunim. ¹⁶ ¿Mnejhuııyb miich ajcxy jada tiy'ajt? Co ixıpy pinjaty ñaygıyegyii co ytuna'ñ miid tüg huindzin huídibi mic yajtumb, copıcy co je tumbi capxymıdohuıpy je yhuindzin. Nañ tim jadu'n nipaady miid pocytunii. Pen mnaygıyəcıp miid pocytunii, huın'it anajty pocy xy'ane'my ma mdzınaayın, ixti mabaad anajty m'ögy miid mbocy ycixpi. Co mnaygıyéjcgixıpy ma Dios,

huin'it ajcxy mgapxymidohuipy Dios, e mdzinähuij ajcxy tudägy. ¹⁷ Jecy'ajty miich ajcxy anajty pocy xy'ane'mgixy, co jibic-huinma'ñ mdungixy. Nyajnajxpyich jäygidaacin ma Dios co jadachambi tiempo ti mgöbijccixy cixyot huinjot Dios ytiy'ajt huidibi xyaj'ixpijccixp, e mgapxymidoogixy Dios. ¹⁸ Cristo ti xyaj'a'oyiyyi ajcxy mjot mhuinma'ñ, ca'ydi mjactzinaaygixy pocymiid. Ti mhuinma'ñ mbidaaccixy co mgapxymidohuaangixy Dios e mdzinähuaangixy tudägy. ¹⁹ (Ngapxhuijpyich miich ajcxy cham miid naaxhuiñyäjy y'ayuc ytiy'ajt, com ca' yajxon mhuinjihuiygixy Dios y'ayuc ytiy'ajt.) Jadu'n nej jecy'ajty co ca' anajty mmibijccixy Cristo, ooy anajty mnaygiyéjcgixy xii ya ma jibic-huinma'ñ, e mdundigooygixy xii ya miid mnin'cx. Ooy miich anajty ajcxy miidty jibicpi ma mjot mhuinma'ñ, ooy anajty mdundigooygixy. Jadachambi xii tiempo naygiyéjcgix ma Jesucristo, jigix jëbi huaad mdungixy miid tudägy jot tudägy huinma'ñ, etz jigix jëbi huaad mdzinaaygixy miid huädz jot huädz huinma'ñ.

²⁰ Co anajty yi jibic jot jibic-huinma'ñ xy'ane'mgixy, chi ca' je oyjot oyhuinma'ñ anajty xy'oc'ane'mgixni. ²¹ ¿Ti jotcujc'ajtin miich ajcxy ti mbaatcixy co jibic jot jibic-huinma'ñ mdungixy huidibi jadachambi tiempo mdzöydu'n'ajtip ajcxy? Yi jibic jot jibic-huinma'ñ xyyajnicxp ajcxy ma yi o'cin. ²² Jadachambi xii tiempo Dios ti yaj'oyiy nej jëbi m'ixmájtzcixipy yi pocytunii, ca' huaad mjactzinaaygixy pocymiid. Ti m'ahuimbijtcixy Dios ytumbi, jadyaabi tzinaayin xymöhuip ajcxy mjotcujc'ajtin. Tiydudägy cham tzinaaygix miid Dios ycixpi, e mbaadip ajcxy jugy'ajtin huidibi ca' ycixipy ytiyoyipy nimina. ²³ Yi pocytunii ycoju'ñ yi' je' yi o'cin. Per je huidibi Dios xyñimooyim, hue' je' je jugy'ajtin

huidibi ni caminaxi ycixipy ytigoyipy co n'ijtim miid ajt nHuindzin Jesucristo.

7

Tüg ijxpejt huidibi yajpatp ma picychinaayin

¹ Miich ajcxy migügtijc huidibi ti m'ixpicy Dios ycötujcin huidibi Moisés yjaay, mnejhuiyb miich ajcxy co yi naaxhuiñyjäy ycötujcin ymiid mic'ajt ma ajt ndzinaayin, ixti mabaad anajty n'o'cim. ² Paady co tüg töxyjäy ycivilbicy miid tüg yëydijc, ca' huaad ixmach ñäy mabaad china'y yjugy'aty. Co janchtiy anajty je töxyjäy ñiyëydijc ti y'öcni, huin'it anajty ca' ocmiidiñ ñäy y'ane'min. ³ Ooy anajty mij ytundigoy je töxyjäy co ypigipy miid huingbi yëydijc pen jugy'ajtne je ñäy. Cooni janchtiy anajty ñiyëydijc ti y'ögy, huin'itni janchtiy jëbi ypicy miid huingbi yëydijc, e ca'p je' anajty ytundigoy.

⁴ Miich ajcxy nmigügtijcich, judiojäy huidibi mibijcp Cristo, jayijp co anajty ca'ni mmibijccixy Cristo, je Dios ycötujcin huidibi Moisés yjaay xy'ane'mgixp anajty ma mdzinaayin. Jadachambi xii tiempo yi jadu'mbi cötujcin ca' yi' xyjac'ane'mgixni. Jadachambi Cristo ytiy'ajt xy'ane'mgixp, je Cristo huidibi Dios yajjugypijc jadüg'oc co y'o'cy. Jadu'n miich ajcxy nipaady nej je töxyjäy huidibi ñiyëydijc ti y'ögy, e ti ypijctigach. Cristo miich ajcxy xyñigohuajc'ajtp, jigix jëbi mdzinaaygixy miid Dios ycixpi. ⁵ Jayijp ca'ni anajty nmibijcim Jesucristo ooy anajty nguyduunim huidibi ajt nninixc ñijot'ajt. Je huin'it tiempo anajty je jibic-huinma'ñ xy'ane'mim ma ajt ndzinaayin. Je' je' je jibic-huinma'ñ huidibi Dios xycap'adujcim miid ycötujcin. Miid co jibic-huinma'ñ xy'ane'mim anajty ajt ma ndzinaayin etz xyajnicxaanim anajty ma yi o'cin. ⁶ Jadachambi xii tiempo Dios ycötujcin huidibi Moisés xymooyim, ca' ti mic'ajt miidity ma ich

ajt, ti n'ixmajtzim. Jadu'n nipaady nejhuïy ti n'o'cim, e njugypijcim jadüg'oc. Paady nguyduunim je jemybi tiy'ajt huidibi je Espíritu Santo xyajnejhuïyim. Canan je' anajty nguyduunim je jecy'ajtpy cötujcin.

Je pocy huidibi ijtp ma ñch

⁷ ¿Nej n'ocmínaaním? ¿Nej janch co je cötujcin huidibi Moisés xymooyim xyajpocytuunim anajty? Ca' yjadu'nity. Co ixypy ca' anajty nmiididyich Moisés ycötujcin, ca' ixypy ñch ti nnejhuïyich co ti ndundigooyich ma Dios ytiy'ajt. Co ixypy anajty ca' n'ocnejhuïyich Moisés ycötujcin ma jadu'n ymíañ: “Ca' mmigüg ni ti m'adzojipy.” Ti ixypy ndundigooyich, e ca' ixypy nejhuïyich ma ti ndundigooyich. ⁸ Miid co ñch jecy'ajty ooy anajty nnijot'atyich pocyuní, paady ycixpi ñch anajty ooy ndundigooyich. E jadu'n anajty ñgi ooy n'adzocyich, e jaminam anajty Dios ycötujcin co ca' migüg ni ti m'adzojipy. Co ixypy Dios ca' jadu'n cötujcin ti pidägy, ni ca' ixypy njihui'ñybicyich co ndundigooyich. ⁹ Jayijp co ca'ni anajty nhuinjihuiyich Dios ycötujcin, huin'it tiempo ca' anajty njihui'ñybicyich nbocy. E co nbatyich Dios ycötujcin, chi njihui'nybijcyich nbocy, e nañ ti nejhuïyich co tigoyaamich njugy'ajtin. ¹⁰ Dios ypidac ycötujcin jaydëbi nbáadibich jugy'ajtin huidibi ca' ycixipy ytigoyipy. Per ca' jadu'n ti oyíy miid ñch. Yi cötujcin ti xyajpocycäyich anajty, e jadu'n tigoyaambich anajty njugy'ajtin. ¹¹ Jadu'n anajty huinma'ñ nmiididyich co nguydundähuaamybich Dios ycötujcin huidibi Moisés yjayhui'm. Pero com ca' njatyich nej nguydundähuiyich, chi nbocycäyich ma Dios. Je pocyuní ti xyhuin'ññich, e miid je' ycixpi nbadaamybich anajty yi o'cin.

¹² Tüg'óciy Dios yley etz Dios ycötujcin huidibi cojay ijtp, huadz yi', tudägy yi', ooy yi'. ¹³ ¿Nej tigoyaambich

anajty njugy'ajtin miid co anajty nmi'ityich Dios oybi cötujcin? Ca' yjadu'nity. ¿Nej je Dios ycötujcin je oybi ti huimbidzimy jibic miid iich co xyajtigoyaanich anajty njugy'ajtin? Ca' yjadu'nity. Nicxpich anajty ma yi o'cin miid nbocyich ycixpi. Je Dios ycötujcin xyajnejhuüiyich co o'cin nbadaamybich miid nbocyich ycixpi. Jadu'n Dios pidacy ycötujcin ya naaxhuiñ, jigix jëbi jäy ajcxy nejhuühuipy co mij ajcxy ooy ytundigooy miid Dios.

¹⁴ Nejhuüiyim co yi Dios ycötujcin huidibi Moisés xy-mooyim, jiiby yi' chooñ ma Dios, paady yi' ooy y'oyity. iich nninïcx yi' je' huidibi nijot'ajtp yi' pocytuniï, paady ndzinäyich pocymiid. ¹⁵ Ca' nhuinjihuiyich huidibi ndumyich. Yi oybi huidibi njatunaamybich, ca' njatyich nej ndunipyich. Yi jibicpi huidibi ca' y'oychojcnity, yi' ndumyich. ¹⁶ Co nduñich huidibi ca' ndzocyich, jadu'n niquëxigy co Dios ycötujcin ooy oy yi', tudägy yi'. ¹⁷ Canan jotcujc iich jadu'n co nbocytuñich. Yi pocy'adzojcin huidibi nmiidich ma njot nhuinma'ñ, yi' yi' xyajtundigooybich. ¹⁸ Nejhuüiybich co ca' ti oybi yajpaady ma iich nninïcx. Ooy njatzocyich co oybi njatuna'ñich, per ca' njatyich nej oybi ndunipyich. ¹⁹ Je oybi huidibi njatunaamybich, ca' njaty nej ndunipyich. Je jibicpi huidibi ca' ndzocyich, je' ndumyich. ²⁰ Co yi' nduñich huidibi ca' ndzocyich, yi' je' je' pocytuniï huidijaty njot'ajtibich nhuinma'ñ'ajtibich, yi' xyajtundigooybich.

²¹ Nbaatypich tüg tiy'ajt, co njatunaamybich oy-huinma'ñ, jiipy jibicpi nbaadyich ma njot nhuinma'ñich. ²² Jotjoty huinma'ñjoty ooy nmixondägyich Dios ycötujcin. ²³ E nañ miidich jotjoty huinma'ñjoty yi' jibicpi huidibi mi'ijxtinaayb je oybi. Yi tundigoyiï yajpatp ma iich nninïcx. Yi nninïcxich yajpatp pocymiid.

²⁴ Paady ca' njotcújcigych. ¿Pin jëbi xyñihua'ñich xya-

jnıdzögıbıch ma jadyaab nnınıcxıch huıdıbı xyajrıcxpıch ma yı o'cıń? ²⁵ Dioscojuyıp nyajrıajxypıch ma Dios co Dios, mııd ajt nHuındzın Jesucristo, xyñıhuaanıń ma jada jıbıcpı huıdıbı ajt nnınıcx xyñı'jot'ajtıń. Paady mııd n'oyjot n'oyhuınma'ńı ńıyduñıch Dios ycötujcıń. Mııd nnınıcxıch nıjot'atıyıch pocytıńıı.

8

Je jugy'ajt mııd je Dios yjıhuı'ńı ymıc'ajt ycıxpi

¹ Jadachambi tiempo janchtıy Dios ca' tzaachytuna'ńı yı jäy ajcxı huıdıjaty tú'cıy ijtp mııd Cristo Jesús, huıdıbı ajcxı cuydumb Espıritu Santo chojcıń, e ca' ajcxı tungıxy nej je nınıcx nıjot'ajtcıxy. ² Je Espıritu Santo tı xıyajpıdzımım ma yı pocytıńıı etz ma yı o'cıń huıdıbı yı jecy'ajty cötujcıń tı xymooyım. Je Espıritu Santo xyajtzınaayım huınıxıı, ııch ajt huıdıbı ijtp tú'cıy mııd Jesucristo. ³ Mııd co ııch ajt ooy nınıcx ńıjot'atıy jıbıcpı, paady Dios xymooyım ycötujcıń jecy'ajty jaybety. Per je naaxhuıñıyjäy yajtıgoy ajcxı je cötujcıń ymajaa, e ca' ymadacy nıcxı xyajtzınaayım mııd tudägy jot huınma'ńı. Paady Dios yquejxy yci'm'ung huıdı tı chınäy ya naaxhuıñ mııd ńınıcx jadu'n nej ııch ajt nmııdıty nnınıcx, jıgıx jėbı ndzınaayım mııd huädz jot huınma'ńı. Jadu'n Dios y'ung chınay mııd ńınıcx, per ca' nı tı bocy anajty mııdıty. E yı' tı y'ögy mııd ajt nbocy ycıxpi, e jadu'n yajtıgoy je pocy huıdıbı ajt ńıgıx'ajtıń. ⁴ Jadu'n Dios ytuuñ jıgıx jėbı xyajtzınaayım mııd tudägyjot tudägyhuınma'ńı jadu'n nej yı' ycötujcıń y'ane'my. Mııd co nmııd'ajtıń Dios yjıhuı'ńı ymıc'ajt ma ajt njot nıhuınma'ńı, paady jėbı huaad ndzınaayım mııd tudägy-jot tudägy-huınma'ńı.

⁵ Yı jäy ajcxı huıdıbı ca' mııdıty Dios yjıhuı'ńı ymıc'ajt ma yjot yhuınma'ńı, hue' ajcxı ycapxymıdooyb je jıbıcpı huıdıbı ajcxı ńınıcx ńıjot'ajtpy. Yı jäy ajcxı huıdıbı

tzinaayb miid Dios yjihu'i'n ymic'ajt ma yjot yhuinma'ñ, hue' ajcxy ycapxymidooyb je Espíritu Santo. ⁶ Yi jāy ajcxy huidibi capxymidoob je jibicpi huidibi ajcxy ñin'icx ñijot'ajtpy, hue' ajcxy ypadaangixyp o'cin. Yi jāy ajcxy huidibi capxymidoob je Espíritu Santo, hue' ajcxy ypadaangixyp jugy'ajtin huidibi ca' ycixipy ytigoyipy, etz nañ ypadaangixyp jotcuje'ajtin. ⁷ Yi jāy ajcxy huidibi capxymidoob je jibicpi huidibi ajcxy ñin'icx ñijot'ajtpy, hue' ajcxy Dios ymidzip'ajtpy, ca' capxymidohuaangixy Dios ycötujcin. Ni ca' jajtciy nej ajcxy capxymidóogixipy Dios ycötujcin. ⁸ Ca' Dios jāygidägy yi' ajcxy chinaayin huidibi ajcxy capxymidoob je jibicpi huidibi ajcxy ñin'icx ñijot'ajtpy.

⁹ Per miich ajcxy ca' mgapxymidoogixy je jibicpi huidibi mnin'icx nijot'ajtpy. Com miich ajcxy mmiid Dios yjihu'i'ñ ymic'ajt ma mjot mhuinma'ñ, e mguydungixpy je Espíritu Santo chojcin. Huenpinity huidibi ca' miidity Cristo yjihu'i'ñ ymic'ajt ma yjot yhuinma'ñ, ca' yi' y'ity miid Cristo. ¹⁰ Pen miich ajcxy ijtp miid Cristo, yi' mjogy'ajtin ajcxy ca' ycixipy ytigoyipy nimina, miid co Cristo ti xyaj'ahuimbijtcixy tudägy ma Dios yhuinduu. Yi mnaaxnicx cixamb tigoyamb yi'. ¹¹ Pen ijtp ma miich ajcxy mjot mhuinma'ñ je' yjihu'i'ñ ymic'ajt je huidibi yajjugypijc jadüg'oc je Cristo co y'o'cy. Nañ jadu'n miich ajcxy Dios xyajjugypigaangixy jadüg'oc, co anajty ti m'öccixy, miid yi' yjihu'i'ñ ymic'ajt huidi yajpaatp ma miich ajcxy mjot mhuinma'ñ.

¹² Miid co nmiid'ajtim Dios yjihu'i'ñ ymic'ajt paady ycixpi, miich ajcxy migügtijc, copicy ngapxymidoohuim je Espíritu Santo, e ca' huaad ngapxymidoohuim je jibicpi huidibi ajt nnin'icx ñijot'ajtpy. ¹³ Pen ooy ajcxy xytimy'ane'mgixy je jibicpi huidibi ajcxy mnin'icx ñijot'ajtpy, co m'öccixipy, yi' mjogy'ajtin cixip tigoyip yi'.

Per pen miid Dios yjihui'ñ ymic'ajt miich ajcxy myajtigoy je jibicpi huidibi mminicx ñijot'ajtpy, co m'öccixipy, yi mjygy'ajtin ajcxy ca' yi' ycixipy ytigoyipy.

¹⁴ Tüg'óciy pinjaty ajcxy capxymidoob je Espíritu Santo, Dios yi' ung'ajtip ajcxy. ¹⁵ Je Espíritu Santo huidibi miich ajcxy xy'adigiigixp xyjottigiigixp, ca' xychaachytungixy e nañ ni ca' mdzinähuaangixy miid tzig'i'ñ jihui'ñ. Ca' miich ajcxy jadu'n paady nej tumbidijc huidibi ooy tzigiiygixy yhuindzin. Co je Espíritu Santo yajpaady ma ajcxy mjot mhuinma'ñ, jadu'n nipaady nejihuüy miich ajcxy Dios xy'ung'adyii. E com nmiid'ajtim Dios yjihui'ñ ymic'ajt, je' jadu'n xyajminaanim: “¡Dios Teedy!” ¹⁶ Je Espíritu Santo tiy'ajt yejcp ma ajt njot nhuinma'ñ, je' jadu'n xyajminaanim co Dios xy'ung'ajtim. ¹⁷ Pen iich ajt Dios xy'ung'ajtim, chi nbadaanim it lugar quipxyi miid Cristo jiiby tzajpjoty ma Dios yajpaady. Pen nminajxim nyajnajxim tzaachypi jadu'n nej Cristo minajxy yajnajxy tzaachypi, chi nbadaanim Dios y'oy'ajtin quipxyi miid Cristo.

¹⁸ N'a'ixiiybich co yi tzaachypi yi ayo'n huidibi nminajxim nyajnajxim ya naaxhuiñ, ca' yi' ytim ytiijity, ca' ninej yquipxyjatytiy je oy'ajtin etz mijjotcujc'ajtin huidibi Dios xyaj'ixaanim je huin'it xii co Cristo anajty ymiñ jadüg'oc. ¹⁹ Tüg'óciy tijaty ya naaxhuiñ huidibi Dios ti yajcojy yaj'oyi, y'aa'ijxpy yjijp'ijxpy ajcxy mina Dios ymöhuaánigixy y'oy'ajtin ymi'ajtin yi jäy ajcxy huidibi ajcxy Dios ung'ajtip. ²⁰ Tüg'óciy tijaty Dios ti yajcojy yaj'oyi ya naaxhuiñ, hue' je' yjugy'ajtin cixamb tigoyamb, ögam tidzam. E canan ci'm jadu'n tzocy, hue' je' Dios jadu'n ti yajnigödugiy. Per ca' yjugy'ajtin ycixipy ytigoyipy tu'ciyi hue' ajcxy y'aa'ijxpy yjijp'ijxpy co padaangixy oy'ajtin jadüg'oc. ²¹ Co

anajty Dios yaj'oyīy nej jēbi ajcxy chinaaygixy, e ca' y'ōccixipy, ca' ytītzcixipy, etz ca' ypūgixipy, chi ajcxy padaangixy oy'ajt̄in etz jotcujc'ajt̄in quipxyi m̄id je jāy ajcxy huidibi Dios ung'ajt̄ip. ²² Com nejhuīyim co ixti chambaad tūg'ōciy huidijaty Dios yajcojy yaj'oyīy ya naaxhuīñ yjihuīyb tzaachypi, e ca' yjotcujc'ajtcixy. Tim jadu'n nipaady nej tūg tōxyjāy paady tzaachypi co yhuaad'ajtni mina y'ung yajma'xung'ada'ñ. ²³ Canan yi naaxhuīñybi huidi Dios yaj'oyīy yi'yi tzaachypi jihuīyb, nañ jadu'n īch ajt huidijaty m̄id'ajtp Dios yjihuī'ñ ymic'ajt, huidibi Dios xymooyim jayijp'aty ca'n̄i anajty nyajtigajtzim nnin̄icx. Nañ īch ajt tajim mayim n̄jīyim nyaaxim ixti cooni anajty Dios xyajtigadzaanim ajt nnin̄icx etz xycōbigaanim ma yi' y'it jīiby tzajp̄joty, e xymīid'idaanim ajt jadu'n nej yci'm'ung. ²⁴ M̄id co n'aa'ijxim njjip'ijxim co Dios xyajnidzōgaanim ajt n'alma, paady ti nbaatim jugy'ajt̄in huidibi ca' ycixipy ytigoyipy. Co ixypy ti nbaatim huidibi anajty njjip'ijxim, ca' ixypy njacjip'ijxim co nbadaanimni. Com ca' pin jacjip'ijxni co padaanip je huidibi ti ocpatpi. ²⁵ Per co njjip'ijxim co nbadaanim huidibi ca' nmīid'ajtim, huin'it n'ahuijxim m̄id mecxtujcin cooni nbaatim.

²⁶ Tim jadu'n nej jotcujc'ajt̄in nbadaanim co njjip'ijxim huidibi Dios xymōhuaanim, nañ tim jadu'n je Esp̄ritu Santo xypubejtim xypudigīyim co njotmetzc̄īyim, com ca' njajtim nej jēbi huaad Dios nm̄ibjctzoohuim nej ypadyi. Paady je Esp̄ritu Santo xycodinaayim ma Dios, ym̄ibjctzooyb je Dios mictāgy m̄id īch ajt ycixpi m̄id jīȳin yaaxin, huidi ca' huaad yajcapxp̄dzimy m̄id mīydacin. ²⁷ Dios ñejhuīyb ti jot ti huinma'ñ jāy ajcxy ymīid. E Dios nañ huinjihuīyb tūg'ōciy ayuc huidibi je Esp̄ritu Santo yajnaxyp ma yi'. Je Esp̄ritu Santo

ypijctzooyb may'ajt jabom jabom ma Dios miid tüg'óciy je mibijcpidijc ycixpi. Nañ jadu'n pijctzoy jadu'n nej Dios tzocy jäygidägy.

Mij madaacin ma mibijcin

²⁸ Yi jäy ajcxy huidibi mijpidacp Dios, huidibi ajcxy Dios ti huin'ixy, jëbi chinaaygixy jadu'n nej Dios jäygidägy ajcxy chinaayin. Nejhuüiyim co huentimtiijity huidibi yi' ajcxy yminajxpy yajnaxpy, pen jibicpi o pen oybi, Dios jadu'n ti a'ixiy co huen minajxcixy yajnajxcixy miid yi' ajcxy y'oy'ajtin ycixpi. ²⁹ Je' yi' ajcxy huidibi Dios ti yhuin'ixy, je' yi' ajcxy huidibi Dios ñejhuüiy jayijpni co ymibiga'nyii y'ayuc. Dios jadu'n tumb ma yi' ajcxy yjot yhuinma'ñ jaydebi yquipxyjatyty ajcxy yjot yhuinma'ñ miid Dios y'ung, jadu'n nej yi' yjot yhuinma'ñ miidity. ³⁰ Yi mayjäy huidibi Dios yajnjigödugiiy ca'ni anajty naax-huiñybi chondacy co ytuna'ñ miid yi', yi' ajcxy Dios huin'ixi. Yi mayjäy huidibi Dios ti yhuin'ixigixy, nañ Dios yi' ajcxy yaj'ahuimbijtip tudägy. E yi mayjäy huidibi Dios ti yaj'ahuimbity tudägy, nañ Dios yi' yajquipxy-jatytihuaanip ajcxy y'oy'ajtin miid yi' y'ung y'oy'ajtin.

³¹ ¿Ti jada' njacjijp'ijxim ti jada' njactzojcin? Ca' ni ti. Pen Dios ñich ajt xypubejtim xypudigiiyim, ¿pin ñich ajt jëbi xymimadaacim? Janch ni ca pin. ³² Dios ixti yci'm'ung ti yecy miid ñich ajt ycixpi, co oy y'o'cy miid ñich ajt ycixpi, co oy y'o'cy ma yi cruudz miid nidüg'óciy ajt nbocy ycixpi. Paady janch janch co Dios xymöhuaanim tüg'óciy oybi quipxyjaty miid yi' y'ung, Jesucristo. ³³ ¿Pin jada' jëbi ocxiy je jäy ajcxy huidibi Dios ti huin'ixy? Ca' ni pin. Com Dios ci'm yi' ti yaj'ahuimbijttäy tudägy. ³⁴ ¿Pin yi' ajcxy jëbi ocyajpocycäy? Ca' ni pin. Com Cristo o'c je' miid ajt nbocy ycixpi, etz yjugypijcy jadüg'oc, e jadachambi xii tiempo yajpaady a'oy'amy ma

Dios ymijc, e yi' ane'mdaayb tüg'óciy. E Cristo ñich ajt xyñibijctzohuiiyim, ypijctzooyb may'ajt ma Dios miid ñich ajt ycixpi. ³⁵ Com Cristo ooy xychojcin xyjihuiiyim, paady ni nej ca' xy'ixmadzaanim. Huen ti ndimpaatim ca' xy'ixmadzaanim. Oy ixyipy tzaachypi ayo'n nminajxim nyajnaxim, oy ixyipy tajin mayin nbaatim; oy ixyipy jäy xy'ixhuidijtim xypahuidijtim; oy ixyipy yuu ayo'n nbaatim; oy ixyipy huit tucxy nyajmayajtim; oy ixyipy tzigin nyajnaxim; oy ixyipy jäy xytimyyaj'o'cim. Oy ti ayo'n ndimbaatim, Cristo ca' xy'ixmadzaanim. ³⁶ Com jadu'n ymiñ jaybety ma Dios ñecy ma jadu'n ymiñ: Miid miich, Huindzin Dios ycixpi, je nmidzipich xyjatytimyyaj'ögaambich xim tzuum. Jadu'n ñich ajcxy nej cöbixy huidibi yajnicxip ma yaj'öctac co yaj'öga'nyii.

³⁷ Ca' ti ayo'n nbaadaanim. Nmimadactähuaanim tüg'óciy ayo'n, miid co Cristo xychojcin xyjihuiiyim. ³⁸⁻³⁹ Janch nejhuiybich tiydudägy co Dios xychojcin xyjihuiiyim. Ca' ji ni pin jëbi huaad xypijc-huäcxim ma Dios chojcin, oy ixyipy nja'o'cim; oy ixyipy njajugy'ajtim; oy ixyipy xymidzip'ajtim ängel ajcxy etz jacjadyii huidibi mic'ajt miid jilby tzajpjoty. Ca' ajcxy jëbi huaad xypijc-huäcxim ma Dios, ni ti huidibi ji ijtp cham, ni je huidibi mimb cidacp, ni yi' jëbi xycapijc-huäcxim ma Dios chojcin. Ajt nHuindzin Jesucristo ti xyajnejhuiiyim jadu'n nej Dios xchojcin xyjihuiiyim co y'o'cy ma yi' cruudz miid ajt nbocy ycixpi.

9

Dios ti huin'ixy yi Israel jäy ajcxy

¹⁻² Nmiiidich je Cristo ytiy'ajt, nyajnijayiybich miich ajcxy yi' ytiy'ajt, ca' n'indägyich, co ooy ndajy nmayich miid n'amigügtjicich ycixpi je Israel jäy co ajcxy ca'

cöbiga'ñ je Cristo. Nañ Dios yjihui'ñ, je Espóritu Santo, tiy'ajt yejcp ma ñich njot nhuinma'ñ co jadu'n tajin mayin njihuiyich miid yi' ajcxy ycixpi. ³ Com tajy may nayjihuiyijich miid ñich n'amigügtijc, ñich nmigogajp, ixti njaccodinähuaamybich ajcxy ma Dios miid ypocy ycixpi, ixti jëbi ixyipy Cristo nja'ixmachich miid yi' ajcxy ycixpi, ixti jëbi ixyipy Dios xychaachytuñich miid yi' ajcxy ypocy ycixpi, co ixyipy jëbi Dios pocyhuinmecxy ajcxy. ⁴ Com hue' je' ajcxy Israel y'ap'ajtíp y'oc'ajtíp, Israel jäy ajcxy. Hue' anajty ajcxy Dios ti ycöbigyii jadu'n nej jihuüy yci'm'ung, Dios anajty ajcxy ti ñi'ijxcidägyii, y'ijx ajcxy Dios y'oy'ajtín. Dios nimay ajcxy co ycuend'adíp. Dios ajcxy jadu'n yajni'ixiyyi nidüg'óciy tiy'ajt nej ajcxy jëbi huaad Dios huindzigíy, e Dios yajhuinhuaníy Israel jäy ajcxy je Cristo. ⁵ Nañ hue' ajcxy ymij'ap'ajtíp ymijteedy'ajtíp ñich ajt nmij'ap nmijteedy; je Abraham, Jacob, etz David, e ma je' ymiñ ajcxy, ji ymiñ je Cristo, e je' je' Dios ajtp, yi' tüg'óciy ane'mdaayb jilby tzajpjoty etz ya naaxhuiñ. Je Cristo capxpaady y'idípy huinixíi.

⁶ Co jadu'n mina'ñich co may ajcxy Israel jäy ca' ajcxy Dios yjäy'adyii tiydudägyi, ca' jadu'n mina'na'ñich co Dios ca' cuyduñ yi' y'ayuc huidibi yajhuinhuaníy Abraham etz Moisés. ⁷ Canan nidüg'óciy Abraham y'ap y'oc pada'ñ je oy'ajt huidibi yajhuinhuaníy Abraham, com jadu'n yjaybetyity ma Dios ñecy. Dios jadu'n nimay Abraham: “Yi mmang, Isaac, ti nhuin'ixyich jëbi y'ap y'oc paady je oy'ajt huidibi ti nyajhuinhuaníy.” ⁸ Co Dios jadu'n nimay Abraham, paady ycixpi nejhuíyím co ca' nidüg'óciy Abraham y'ap y'oc jëbi naydijyii Dios y'ung. Jëyi Isaac y'ap y'oc jëbi ñaydijyii Dios y'ung com Dios yajhuinhuaníy co may'ajt tuna'ñ miid yi' ajcxy. ⁹ Com jadu'n yjaybetyity ma Dios ñecy co Dios nimay Abraham: “Nihuimbidaamybich

ma je tiempo huidibi ti n'agapxtucyich, e huin'it mdöxyijc Sara y'ungbaadip.”

¹⁰ Ji jadüg tiy'ajt. Hich ajt nmij'ap Isaac ytöxyijc Rebeca metz ymang paty. ¹¹ Dios yhuin'ijx je jacmutzpi ca'ni anajty yma'xung'aty, e ca'ni anajty ñiguëxigty ti huinma'ñ ymiid, oyhuinma'ñ o jibic-huinma'ñ. Dios ninigoob anajty jayijpni ti huin'ixy je jacmutzpi. ¹² Com Dios ñimay je Rebeca co je jacmutzpi y'ane'mamyb y'ajch ma ca'ni anajty Jacob yma'xung'atyñi. ¹³ Tim jadu'n nej jaybety ymiñ ma Dios ñecy, Dios jadu'n minañ: “Jac nigü ti ndzocycich Jacob, ca'ydi Esau.”

¹⁴ ¿Nej n'ocminaanim? ¿Dios ca' tiiybi tuñyi? Ca' yjadu'nity. Dios tiydudägy ytuñ. ¹⁵ Com jadu'n Dios nimay Moisés: “Nba'ayohuipyich ninigoobi pinjaty ndzocpyich.” ¹⁶ Co Dios jadu'n nimay Moisés paady nejhuiiyim co canan paady ycixpi Dios pa'ayohua'ñ jay miid co ajcxy chachñaymija'ijxigixy co tunaangixy oyhuinma'ñ. Hue' je' Dios pa'ayo'n tuñ miid jäy ajcxy ninigoob co jadu'n tzocy. ¹⁷ Com jadu'n jaybety ymiñ ma Dios ñecy co Dios jadu'n nimay je Egipto rey: Hich miich ti nmöy m'ane'min, jigix jëbi jäy ajcxy ixipy je mij ayo'n huidibi ndunaamybich ma miich mnaax mgajp, huin'it jäy ajcxy capxpaady xyaj'idipy huindu'ñybi ñaaxhuiñ.

¹⁸ Dios ypa'ayooyb je' pinjaty chojcpy, e nañ jadu'n yjot yajjuuni pin jadu'n yajmidzocpy.

¹⁹ Huin'it miich ajcxy xyñimähuibich: “Peni janch yjadu'nity, ¿ti co Dios jadu'n jadüg'oc pocy'ixy jäy? ¿Pin jada' occapxhuimbidi nej yi' tzocyi?” ²⁰ Miich jäy, ¿mbin miich co ti myajcapxycoja'ñ myaj'ayucchoja'ñ miid Dios? ¿Nej jëbi pochytüdzt nimäy je pin anajty ti yajcojyii? “¿Nej co jadu'n ti xyajcojyich?” ²¹ Tüdzyajcojpi yi' yaj'oyiyyb je mo'ntz nej tim tzocy. Pen yajcojamyb tüz oybi

tzoopatypi, yajcojpy je'. Peni yajcojamyb tüdz huidibi ca' oyjatyity, yajcojpy je'.

²²⁻²⁴ Tim jadu'n nej je tüdzyajcojpi yaj'oyiyy mo'ntz nej tzocy, nañ jadu'n Dios tuñ miid jäy nej tzocy. Dios ti yajcojpy jäy, e miid ymic'ajt jëb tzaachytuñ miid ypocy ycixpi. E co jadu'n tzaachytunipy, chi ñiguëxigipy yi' ymic'ajt. Dios ooy jecy ti jamimecxtucy ajcxy huidibi paatip co Dios chaachytuniiyb ajcxy. Com Dios ti yajcojpy jäy paady jëb nañ jadu'n pa'ayoohuipy etz may'ajt tunipy miid yi' ajcxy, jëbi ajcxy paadip yi' y'oy'ajtin. Dios iich ajt ti xyhuin'ijxim nijjëjity judíojäy, etz nijjëjity huidibi ca' yjudíojäyity, jëbi ajt n'alma nidzoocin paady. ²⁵ Com jadu'n jaybety ymiñ ma Oseas ñecy ma Dios jadu'n yminañ:

Yi jäy ajcxy huidibi iich ca' anajty njäy'adyii, njäy'adäänibich cham. Yi jäy huidibi ca' anajty ndzocyich, ndzogäänibich cham.

²⁶ E nañ jadu'n jadüg'it Oseas cojay: “E je jäy ajcxy huidibi anajty tzinaayb ma canaag naax cajp huidibi anajty ca' Dios yjäy'adyii, jëb ñaydiyii Dios yjäy, je Dios huidibi huinixii tzinaayb.”

²⁷ Nañ jotmay miid co Isaías jada tiy'ajt ycojay ma ñecy ma jadu'n ymina'ñ: “Oy ixypy ajcxy ti yjamayy jadu'n nej tzaa'ung yajpaady ma mejy ypa', nihueeñ ajcxy y'alma ñidzoocin pada'ñ. ²⁸ Com Dios mic ooy cötujcin miidity, e ca' mimecxtugipy jäy ajcxy ypocytunii huinixii. E mic'amy tzaachypi möhua'ñ naaxhuinyjäy miid ypocy ycixpi co anajty xii tiempo paatni mabaad agapxtujcy.”

²⁹ Isaías ñajtzcapxiy jadu'n jecy'ajty:

Pen ca' ixypy je Huindzin Dios huidibi ane'mdaayb jiliby tzajpjoty etz ya naaxhuiñ, capubejty yi' Israel jäy, co ca' ycajacyajtzooci nijjëjity ajcxy, ycacödigoyday yi' ajcxy, tim jadu'n nej je jäy

ajcxy yjajty jim ma Sodomo cajp etz Gomorra cajp, cödigoyday ajcxy.

Yi judíojäy ajcxy etz Jesucristo y'ayuc ytiy'ajt

³⁰ Jadu'n jëbi mhuinjihuiiygixy huidibi ti nyajni-jayiygixy jadu'n nej Dios ytun miid jäy ajcxy. Yi jäy ajcxy huidibi ca' yjudíojäyity, huidibi ca' cuyduñ Dios ycötujcin je jecyip, co ajcxy mijpidägy je Cristo, chi ajcxy paady tudägy'ajtin ma Dios. ³¹ Per yi judíojäy ajcxy huidibi jip'ijxp co tudägy'ajtin padaangixy miid co tzachcuydungixy Dios ycötujcin je jecyip, ni ca' ajcxy mimadägy cuydundähuipy, e ca' ajcxy tudägy'ajtin paady ma Dios. ³² ¿Na'amy co ca' ajcxy mimadägy cuydundäy Dios cötujcin? Je' co ajcxy ca' mijpidägy huidibi Dios ti tuñ miid yi' ajcxy ycixpi. Hue' ajcxy tijy co tudägy'ajtin padaangixy ma Dios miid co tzachcuydungixy Dios ycötujcin je jecyip. Hue' ajcxy ayo'n ypadamyb co ca' Cristo cöbijccixy, tim jadu'n nej jäy ayo'n paady co ycönepy ma tüg tzaa. ³³ Com jadu'n jaybety ymiñ ma Dios ñecy, ma Dios jadu'n ymina'ñ:

Nguexaamybich jim Jerusalén tüg jäy. Mayjäy ca' mijpidäga'ñ je jäy, e ayo'n ajcxy ypadamyb ma ñich. Tim jadu'n nej ixypy ti nbidägyich tüg tzaa ma jäy ajcxy huaad ycönejpccixy, e chi yciday ajcxy. Tüg'óciy jäy pinjaty mijpidaacp je jäy huidibi nbidägaamybich jim Jerusalén, hue' ajcxy yi' ca' ayo'n pada'ñ ma ñich, nbocyhuinmecxaamybich yi' ajcxy.

10

¹ Miich ajcxy nmigügtjicich, ooy ndzocyich cixyjot huinjot co yi Israel jäy nidüg'óciy pada'ñ y'alma ñid-zoocin. Ooy ñich nigí Dios nmibijctzoy miid yi' ajcxy ycixpi. ² Jëbi ndiy'ajt yecyich co yi Israel jäy ooy

ajcxy Dios jayajmij'ajtcixy. Hue' janchtiy ca' ajcxy huinjihuüy Dios ytiy'ajt. ³ Com nejhuiyb ajcxy co Dios yajpocyñihuädzamyb jäy ajcxy, hue' ajcxy ca' huinjihuüy nej Dios yhuinma'ñ miidity. Ci'm anajty chachhuinma'ñ ixtaaygixy nej ajcxy jëbi ñayyajpocyñihuädzigixipy. Ca' anajty ajcxy cöbicy Dios ytiy'ajt nej jëbi huaad ñayyajpocyñihuädziyb.

⁴⁻⁵ Yi judíojäy ajcxy ca' huinjihuüygyxixy co je Cristo y'oy ya naaxhuiñ, e chi yajtigooyi Dios ycötujcin ymic'ajt huidibi Moisés yjay, jigix jëbi tüg'óciy jäy pinjaty mijpidacp Cristo ytiy'ajt, huin'it ajcxy paadip tudägy'ajtin. Moisés yjayhui'm ma jadu'n ymina'ñ: “Je pinjaty cuydumb je Dios ytiy'ajt, jim mic'ajt paadipy miid chinaayin ycixpi.” ⁶⁻⁷ Per yi jäy ajcxy huidibi mijpidaacp Cristo etz cuyduni yi' ytiy'ajt, yi' ajcxy ymina'ñ: “Ca' huaad judíojäy ajcxy yminaangixy jotjoty huinma'ñjoty: ¿Pin ocpättigihuiip tzajpjoty nicx je Cristo yajtzoñ? o ¿Pin nicxamb ca'oydactuuby ma ajcxy öcpidijc y'ity e yajjugypigaanip je Cristo?” ⁸ ¿Nej Dios y'ayuc ymina'ñ? Jadu'n Dios y'ayuc ymina'ñ: “Ti mmidoy miich ajcxy Dios y'ayuc ytiy'ajt ma mgi'm'ayuc, ti jäy ajcxy capxhuäcxy ma miich, ti mmido'mbijccixy.” Pues jada je' je y'ayuc tiy'ajt nej jëb mijpidaaccixy Cristo, huidibi tiy'ajt iich ajcxy ngapxhuäcxp. ⁹ Pen miich mgapxypidzimyb mayjäy agujc co miich ajcxy Jesús mHuindzin'adyii, etz mmibijcypy ajcxy ma mjot mhuinma'ñ co Dios ti yajjugypijcy Jesús co y'o'cy, huin'it m'alma paadip ñidzoocin ma Dios. ¹⁰ Co mmijpidägyipy Jesús cixyjot huinjot huin'it Dios xyajpocyñihuädziy. Co mgapxypidzimipy mayjäy agujc co miich mijpidägy Cristo Jesús, huin'it yi m'alma ñidzoocin pada'ñ.

¹¹ Com jaybety jadu'n miiñ ma Dios ñecy, ma jadu'n

yminañ: “Nidüg'ociy jäy huídijaty mijpidacp je Cristo, ca' ajcxy ayo'n pada'ñ ma Dios.” ¹² Jëbi nidüg'óciy jäy mijpidägy je Cristo Jesús com Dios tú'ciy yajhuinhuaniy pocyñihuaatzin ma yi judíojäy etz ma huidi ca' yjudíojäyity. Ji tüg Huindzin je Jesucristo huídibi niHuindzin'ajttaayb. Jesucristo may'ajt oy'ajt tunam mijcajee miid huentimpinjäyity pinjaty pijczoob pubejtin ma Dios miid yi' yxii. ¹³ Com jadu'n jaybety ymiiñ ma Dios ñecy, ma jadu'n ymina'ñ: “Nidüg'óciy jäy pinjaty Dios mibijctzoob miid Huindzin Jesucristo yxii, yi' ajcxy y'alma paadip ñidzoocin.” ¹⁴ ¿Nej jëbi jäy ajcxy occohuanïy Jesucristo co huen y'alma nïdzögy, pen ca' anajty ti mibijci je ytiy'ajt? Pues ca' yjadu'nity. ¿Nej jëbi jäy mibicy Jesucristo peni ca'ni ajcxy amido'ijti y'ayuc? Pues ca' yjadu'nity. ¿Nej jëbi jäy ajcxy midoogixy Jesucristo y'ayuc, pen ca' pin capxhuäcxy ma yi' ajcxy? ¹⁵ ¿Nej jëbi jäy ajcxy capxhuäcxy Jesucristo y'ayuc ytiy'ajt, pen ca' pin yquexyii ayuccapxhuäcxpi? Com jaybety jadu'n ymiiñ ma Dios ñecy, ma jadu'n yminañ: “Ooy oy jäy ñayjihuiyii co pinjaty mimimb mija'tp oybi tiy'ajt, pinjaty capxhuäcxp oybi tiy'ajt ma yi' ajcxy.”

¹⁶ Per ca' nidüg'óciy jäy mibicy je oybi tiy'ajt, com Isaías jadu'n cojay ma ñecy ma jadu'n yminañ: “Huindzin Dios, ¿pin ti mijpidägy iich ajcxy n'ayuc?” ¹⁷ Cooni jäy ajcxy capxhuäcxy Jesucristo ytiy'ajt ma jäy chinaaygixy, huin'it ajcxy ymibijccixy com ti amido'ijtcixy je tiy'ajt.

¹⁸ Per n'amidooybich miich ajcxy: ¿Nej ca' jada' yi judíojäy ajcxy midoy Dios ytiy'ajt? Janch jadu'n ti ajcxy jamidoy, com jaybety jadu'n ymiñ ma Dios ñecy ma jadu'n yminañ:

Ti capxhuäcxy ajcxy Dios y'ayuc ytiy'ajt huindu'mybi naaxhuiñ. Ti ajcxy Dios y'ayuc midodaayi huindu'mybi naaxhuiñ.

¹⁹ Jadüg'oc n'amidoogixy: ¿Nej ca' Israel jäy jada' ajcxy nejhuüy Dios ytiy'ajt? Ñejhuüyb ajcxy. Com jecy'ajty Moisés ycojay ma ñecy ma Dios jadu'n yminañ:

Nyajpocynüihuaatztähuübyich yi jäy ajcxy huidibi ca' iich njäy'adyii, e huin'it miich ajcxy cohuindoyii mjihuihuüpy müid yi' ajcxy ycixpi. Ndunüpyich may'ajt müid yi' ajcxy, e huin'it miich yi' ajcxy mmijotmädiþ.

²⁰ Jadu'n jadüg'it Isaías cojay ma yi' ñecy, ma Dios jadu'n yminañ:

Yi jäy ajcxy huidibi ca' xy'ixtäyich, ti xypaadyich ajcxy. Ti nyajniguëxgyich ndiy'ajt ma yi' jäy huidibi ca' xyñidiy xyajtiyich.

²¹ Com jadu'n jaybety ymiñ ma Dios ñecy, ma Dios jadu'n nigapxy yi Israel jäy co jadu'n yminañ:

Jabom jabom ti njamimecxtucyich yi Israel jäy ajcxy. Ti njayajnimäyich iich ndiy'ajt, e ca' ajcxy mijpidägy. Hue' ajcxy ca' xycapxymidooyich, xymijotmij'öcpich ajcxy.

11

Yi Israel jäy ajcxy huidibi ti ypcynühuaatzcixy

¹ Paady n'amidoogixy: ¿Nej ti jada' Dios ix'ijxni ix-tijni yi Israel jäy ajcxy? Pues ca' yjadu'nity, Dios ca' yi' ixmachñi Israel jäy ajcxy. Com nañ Israel jäy iich. Abraham nmij'ap'ájtibich nmijteedy'ájtibich e nañ jim ngogájpidyich ma anajty Benjamín ycogajpity. ²⁻³ Dios ca' ixmach yi' yjäy huidibi yhuin'ijx jecy'ajty co jäy'ada'ñyii jigix jëbi may'ajt oy'ajt tunüpy müid yi' ajcxy. ¿Nej ca' ajcxy mnejhuüy nej jaybety ymiñ ma Dios ñecy jadu'n nej Elías nigapxy yi Israel jäy ma Dios? Jadu'n yminañ:

Huindzin Dios, ti yi Israel jäy ajcxy yaj'öctäy huidibi anajty miich m'ayuc xycapxhuäcxip. Ti ajcxy yajhuindigoydäy je tzaa macxy ma anajty jäy xyhuindzigiy. Naydügpajc iich ti njachui'myich njaccapxhuäcxyich miich m'ayuc, e nañ xyaj'ögaamich jäy ajcxy.

⁴ E chi Dios y'adzooy nimay Elías:

Ca' mim naydügity, ji iich ahuing nmüididyich yujcicy jahuixtujc mil yëydijc huidi xy'ojadajtpich xyhuindzigiiybich chambaad, huidibi ca'ni huin-goxtinäy yi Baal, yi dios falso, ca'pi ti mic'ajt müidity ni ti tzöc'ajt ca müidity.

⁵ Tim jadu'n nej Dios müidity anajty huixtujc mil yëydijctijc jecy'ajty co anajty Elías yjugy'aty, nañ tim jadu'n cham ma iich ajt nxii ndiempo Dios ymüid nijëjity judíojäy huidibi ti pa'ayoy, e paady ycixpi ti yhuin'ixyüi jëbi yi' jäy'adyii. ⁶ Com co ixypy ajcxy yajxon cuyduni Dios ycötujcin, ca'p ni ti pa'ayo'n Dios jactunaani müid yi' ajcxy, com co ti anajty jim Dios y'ayuc ycuydundäyüi.

⁷ ¿Ti ti ytunyüi ti yjadyüi müid yi Israel jäy ajcxy? May ajcxy ca' may'ajtin oy'ajtin paady ma Dios jadu'n nej ajcxy jüjp'ijxcixy. Jëyi ajcxy huidi Dios huin'ijxi ti ajcxy paatcixy oy'ajt ma Dios. Yi jacjadyüi Israel jäy ajcxy Dios nüg ooy yajjotmij'öccixy. ⁸ Com jadu'n jaybety ymüiñ ma Dios ñecy jadu'n nej Dios yajjotmij'ögy yi Israel jäy, ma jadu'n yminañ:

Tim jadu'n ajcxy nipaady nej jäy ajcxy huidibi ti ymi'öctigooyüi, jadu'n nipaady nej jäy huidibi huiintzip, jadu'n nipaady nej huidibi cönatip.

⁹ David nañ jadu'n ycojay jecy'ajty ma ñecy, ma jadu'n yminañ:

Huindzin Dios, cham je jäy tzachnixondägy yi tzinaayin yi jugy'ajtin, ca' ajcxy xyjäymech. Timitéini ajcxy

ayo'n möhuipy; tim jadu'n nej iyujc ayo'n paady co yajtüxuuch o co yjut cögäy.

¹⁰ Yajma'ti ajcxy yjot yhuinma'ñ, huen ahuimbijtcixy jadu'n nej jäy huintzpi. Mö ajcxy tzaachypi huinixii huinitiempo, tim jadu'n nej jäy ajcxy tzaachypi jihuüy huidibi jemxypi tzimiccixp.

Yi ypocyhuinmeecxin huidibi ajcxy ca'p yjudiojäyity

¹¹ Co jadu'n yi maybi Israel jäy ca' cöbijccixy Dios ytiy'ajt, ¿nej mdiy, ti Dios y'ixmachyii ajcxy tücci'yi, e yajtigoya'ñ ajcxy? Pues ca' yjadu'nity, ca' Dios ixmach yi Israel jäy ajcxy tücci'yi. Co yi Israel jäy ca' cöbijccixy Dios ytiy'ajt nej Cristo y'o'cy miid yi' ajcxy ypocy ycixpi, paady cöbicy yi huidibi ca' yjudiojäyity, jëbi ajcxy y'alma nïdzocin paady. Jadu'n Dios ytuñ jigix jëbi yi judiojäy ajcxy cohuindoyii jihuühuipy, e chi nañ jadu'n mijpidägiy ajcxy Jesucristo. ¹² Pen yi mayjäy ajcxy huidijaty ca' y'israeljäyity mij'oy'ajtin mijjotcuyc'ajtin ti paady, miid co yi jacmaybi Israel jäy ca' cöbijccixy Jesucristo, chi nigü oy'ajtin jotcuyc'ajtin pada'ñ yi naaxhuiñyjäy ajcxy co anajty nidüg'óciy Israel jäy yjothuimbijttaaygixy etz cöbijtaaygixy je Cristo.

¹³ Cham nijayiygixy miich ajcxy huidi ca' yjudiojäyity, com Dios ti xyquexyich ngapxhuäcxich yi' y'ayuc ma yi jäy ajcxy huidibi ca' yjudiojäyity. Ooy nyajcopicyich jada ndungich, jigix jëbi judiojäy oy'ajtin paady nañ jadu'n.

¹⁴ Ca' jecyity co iich n'amigügtijc, yi judiojäy ajcxy, cohuindoyii ajcxy jihuühuipy, co anajty mayjäy huidi ca' yjudiojäyity mijpidägy iich n'ayuc. Co jadu'n ajcxy cohuindoyii jihuühuipy, chi ajcxy nañ jadu'ñ mijpidägiy Jesucristo. ¹⁵ Com pen je naaxhuiñyjäy huidibi ca' yjudiojäyity, huidibi Dios jecy'ajty ca' jäygidaci ajcxy chinaayin, pen ti ajcxy cöbijci Dios ytiy'ajt, pen ti ajcxy oy'ajtin

paady ma Dios, miid co Dios ti ixmach yi Israel jäy huidibi ca' cöbicy yi' ytiy'ajt, chi yi Israel jäy co ajcxy jadüg'oc yjothuimbidity etz cöbigipy Dios ytiy'ajt, nañ jadu'n ooy yjotcugihuiipy ajcxy, jadu'n nejjihuiy ti ajcxy y'ögy etz nej jihuiy ajcxy ti yjugypicy jadüg'oc. ¹⁶ Com co Abraham, Isaac etz Israel Dios anajty jäy'ajtíp, paady nañ jadu'n tüg'óciy Israel jäy Dios jäy'adyii, miid co Israel y'ap'ajtíp y'oc'ajtíp ajcxy. Tim jadu'n nejjihuiy judíojäy ajcxy tzajcaagy puuducy möy Dios, nañ jadu'n je ytujectuc huidibi jac-hui'm nañ Dios je' yje', e nañ tim jadu'n nej co jäy ajcxy möy Dios quipy ytictz, tüg'óciyi je' Dios je'ajtäyii quipy y'aacxy.

¹⁷ Hue' je' nijëjity Israel jäy ca' mijpidägy Dios ytiy'ajt, paady ñajtz'ixiiyi, e may'ajt oy'ajt tuñ miid huingbi jäy huidi ca' israeljäyity. Tim jadu'n nej jihuiy tüg oyguipy huidi tim'ajtp yajpubuxy y'aacx, e je ma ti yajjippujxtüty, je' yjijp yajpidägy ma huingbi quipy y'aacx. Miich ajcxy huidi ca' yjudíojäyity huidibi ti mibicy je Cristo, ti mbaady Dios y'oy'ajt tim jadu'n nej judíojäy ajcxy jecy'ajty miidity Dios y'oy'ajt. ¹⁸ Ca' huaad amij agix mnayjihuiyigixy, e ni ca' huaad m'ixtjicixy yi judíojäy huidibi ca' mijpidaaccixy je Cristo. Miich ajcxy yi m'oy'ajt ti mbaady ma Dios, tim jadu'n nej je quipy y'aacx mic'ajt paady ma yi quipy ytictz.

¹⁹ Ca' yjecyity co miich ajcxy mina'naangixy co Dios najtz'ixiiy yi judíojäy huidibi ca' mibicy Cristo, jaydëbi miich ajcxy mnaydiyiyi co Dios xyjäy'adyii. ²⁰ Tiy'ajt jadu'n nej miich mina'ñ. Dios ñajtz'ixiiy yi maybi judíojäy miid co ajcxy ca' mibicy Jesucristo. E Dios miich ti xycöbicy miid co ti mmibicy Jesucristo. Per ca' huaad miich amij agix mnayjihuiyiyi miid co Dios ti xycöbicy. Naygüend'adii yajxon ma Dios ytiy'ajt, tzigi' Dios. ²¹ Com Dios ñajtz'ixiy yi judíojäy ajcxy miid co ca' ymijpidägyii

yi' ytiy'ajt. Nañ jadu'n miich ajcxy yi' xyñajtz'ixihua'ñ, pen ca' mmijpidaaccixy yajxon yi' ytiy'ajt. ²² Cuentipic jadu'n nej Dios may'ajt oy'ajt tuñ miid nijējity jāy, etz mic tzaachytuñ nijējity jāy. Dios mic tzaachytuñ je judío jāy huidibi ca' ycapxymidoy, etz may'ajt oy'ajt tuñ miid miich ajcxy huidi capxymidoob. Jaccuydun yajxon Dios ytiy'ajt, e nigī Dios may'ajt oy'ajt xytuunipy, pen ca' mguyduni yi' ytiy'ajt, huin'it Dios xyñajtz'ixihuipy. ²³ E nañ jadu'n yi' judío jāy ajcxy huidi ca' mibijccixy Jesús, co ajcxy yhuinma'ñ yajtigadzipy, e mijpidāgipy Jesús, huin'it Dios ycōbigiib jadüg'oc, etz Dios miid ymic'ajt jēbi may'ajt oy'ajt tunipy miid yi' ajcxy. ²⁴ Com pen miich ajcxy huidi ca' yjudío jāyity hidibi jecy'ajty anajty ca' Dios jāy'adyii, pen miich ajcxy Dios mic'amy ti xycōbicy, nañ jadu'n jactzojc cōbiga'ñ hidibi ajcxy judío jāyip, pen ycōbijcy ajcxy.

Jadu'n nej Dios yajnidzoocogixihua'ñ Israel jāy ajcxy

²⁵ Miich ajcxy nmigūgtijcich, nyajnijayiyb ajcxy jadu'n nej Dios tuna'ñ miid yi' Israel jāy, jaydēbi ca' miich ajcxy amij agix mnayjihuihuiyb, etz jaydēbi mnejhuihuipy jada tiy'ajt hidibi ca' pin nejhuīy, co yi' Israel jāy ajcxy ooy ajcxy y'aamijity yjotmijity, ca' ajcxy capxymidoy Dios. E jadu'n ajcxy y'ida'ñ mabaad anajty yca'pxy je mayjāy, ca'pi y'israel jāyity je hidibi mijpidāgam Jesu-cristo ytiy'ajt. ²⁶ Nejhuiyim co Dios may'ajt oy'ajt tunamb jadüg'oc miid tūg'óciy Israel jāy ajcxy, com jadu'n jaybety ymiñ ma Dios ñecy ma Dios jadu'n ymina'ñ:

Jacjiini tūg Israel jāy ymina'ñ hidibi yajnidzōgamb ajcxy ma yi' ypocy. Yi' yajtigoyaanip Israel jāy ypocy.

²⁷ Jadüg'it jaybety ymiñ ma Dios jadu'n ymina'ñ: Jadu'n nyajhuinhuaniiyich yi' Israel jāy co yi' ajcxy ypocy nyajtigooybich.

²⁸ Co yi Israel jäy ca' mijpidaaccixy Jesucristo ytiy'ajt, chi Dios ajcxy ñajtz'ixiyyi. E co ñajtz'ixiyyi ajcxy, paady ycixpi miich ajcxy Dios ti yxcöbicy, co ti mmijpidaaccixy Jesucristo. Per chambaad Dios jactzojctay yi Israel jäy miid co Dios huin'ijxy yi Abraham, Isaac etz Jacob jecy'ajty jëbi yi' yjäy'adyii. ²⁹ Dios ti huin'ixy yi Israel jäy ajcxy jëbi yi' yjäy'adyii, etz tüg'óciy huidi yajhuin-huaniiy co möhua'ñ, co may'ajt tuna'ñ miid yi' ajcxy ycixpi. Ymöhuipy yi', ytunipy yi'. Dios ca' y'ayuc yajxigy. ³⁰ Miich ajcxy huidi ca' yjudíojäyity jecy'ajty ca' anajty mmijpidaaccixy Dios. Jadachambi xii tiempo Dios miich ajcxy ti xypa'ayoy, miid co yi Israel jäy ca' mijpidägy Cristo ytiy'ajt. ³¹ Yi judíojäy jadachambi xii tiempo ca' mijpidaaccixy Dios ytiy'ajt, tim jadu'n nej jecy'ajty miich ajcxy ca' anajty mmijpidaaccixy Dios ytiy'ajt. Jacjiini Dios pa'ayoohuin tuna'ñ jadüg'oc miid yi judíojäy ajcxy tim jadu'n nej ytuñ miid miich ajcxy jadachambi xii tiempo. ³² Com Dios anajty ti yajpocycädäy tüg'óciy jäy co ajcxy ycapxycömíodacy, yi judíojäy etz nañ huidi ca' yjudío-jäyity, paady ycixpi Dios pa'ayo'n tuñ miid nidüg'óciy jäy, judíojäy etz nañ huidi ca' yjudíojäyity, tüg'óciy pin mijpidacp yi' ytiy'ajt.

³³ ¡Ooy ycodzigijity Dios! Dios ooy mijcajee may'ajt oy'ajt tuñ miid jäy ajcxy ycixpi. Dios ooy mijcajee mijhuinma'ñ ti tuñ miid jäy ajcxy ycixpi. Dios ooy mijcajee ycohuinma'ñity. Ca' ni pin jëbi huinjihuidäy je ayuc huinma'ñ huidi Dios ymiid. Etz nañ ca' ni pin jëbi huinjihuidäy huidibi Dios ytumyb. ³⁴ Com jaybety jadu'n miiñ ma Dios ñecy ma jadu'n ymina'ñ: Ca' ni pin jëbi huinjihuidäy nej Dios yhuinma'ñ miidity. Ca' ji ni pinjäy huidi ti capxhuijy Dios. ³⁵ Ca' ji ni pinjäy huidi tijaty ti ocmooybi Dios. Dios ca' ni ti nuucxy miidity miid ni pinjäy.

³⁶ Tüg'óciy huídijaty ñch ajt ya nbaatim, ac jiiby choondäy ma Dios. Yi' tüg'óciy ti yaj'oyiydäy, e yi' je'ajttaayip tüg'óciy. ¡Tzoc Dios capxpaatim ojadajtim huinixii huinitiempo! Jadu'n jadu'n. Amén.

12

Je jugy'ajtin cixyjot ma Dios

¹ E jadu'n nmügügtjicich, cham ñch miich ajcxy nimaaygixy mictägy, com co Dios ti xypa'ayoogixy, paady ycixpi nay'ayéjicigix naygïyéjicigix amuumdügjot ma Dios. Cuychinayi yi ytiy'ajt yajxon jabom jabom. Tzinaaygix mïid huädz mjot mhuinma'ñ, jadu'n nej Dios jëbi jäygidägy yi mdzinaayin. Jada je tiy'ajt nej jëbi Dios m'ojadajtcixy tiydudägy. ² Ca' ajcxy mguydungixy mguychinaaygixy yi naaxhuiñyjäy ajcxy yjibicjot yjibic-huinma'ñ huídibi tzinaaygixp jadachambi xii jadachambi tiempo. Com Dios ti xymoogixy jemybi mjot jemybi mhuinma'ñ, paady mguydunipy ajcxy yi' ytiy'ajt. Ixpijccix Dios ytiy'ajt, jigix ajcxy mnejhuïhuïpy huídibi tiy'ajt Dios chojcyp mguydunipy, etz jigix mhuinjihuïhuïpy je oyhuinma'ñ, je tudägyipi huinma'ñ huídibi Dios yjäygidacpy, je huinma'ñ huídi huädzip ca'pxyip.

³ Com Dios may'ajt oy'ajt ti tuñ miid ñch etz ti xymöyich jada tung co ngapxhuäcxich yi' y'ayuc, paady ñch miich ajcxy nimäy nidüg'óciy co ca' huaad amij agix mnayjihuiyigixy, ca' huaad nigí anaxy mnaygömáayigixy ci'm. Nidüg nidüg ci'm huinmaaygixy yajxon huídi tung jëbi myajnicxcixy, jadu'n nej Dios huijy'ajt cujc'ajt ti xymoogixy. ⁴ Jadu'n nej ñch ajt nninïcx ymïid yhuin y'ahuac etz yci' ytecy, je ninïcx abicy ytung mïidity, je huin abicy ytung mïidity, je y'ahuac abicy ytung mïidity,

etz je ci' teczy abicy ytung miidity. ⁵ Nañ tim jadu'n iich ajt huidi mijpidacp Cristo, e ni may iich ajt, e tügpicy jäy iich ajt com tú'ciy nmibijcim. E nije' nije' Dios huijy'ajt cujc'ajt ti xymooyim abicyjaty, nej jëbi nije' nije' Dios ytung nyajnicxim.

⁶ Com abicyjaty Dios ti xymooyim huijy'ajt cujc'ajt, paady copicy nyajtuunim nije' nije' je huijy'ajt cujc'ajt huidi Dios ti xymooyim. Pen Dios ti xymooyim huijy'ajt cujc'ajt jëbi ngapxhuäcxim yi' y'ayuc, copicy ngapxhuäcxim mibaad ixpijcin nmïd'ajtim. ⁷ Pen Dios huijy'ajt cujc'ajt ti xymooyim co jëbi nbubejtim nmigügtijc, copicy nmigügtijc nbubejtim. Pen Dios huijy'ajt cujc'ajt ti xymooyim jëbi nyaj'ixpijcin nmigügtijc, copicy ndung'ajtim yaj'ixpigii. ⁸ Pen Dios huijy'ajt cujc'ajt ti xymooyim co jëbi ngapxhuijim nmigügtijc, co jëbi njot'amijmooyim nmigügtijc, copicy ngapxhuijim nmigügtijc, etz njot'amijmooyim nmigügtijc agujc jotcujc. Pen nyejcin tijaty ma nmigügtijc, copicy agujc jotcujc nyejcin. Je huidi ajcxy nigohuajc'ajtp mibijcpidijc copicy yajxon y'ané'mgixipy. Pen Dios huijy'ajt cujc'ajt ti xymooyim co jëbi nbubejtim jäy ajcxy huidibi ayo'n miid jotmay miid, copicy agujc jotcujc nbubejtim pinjaty ayo'n miid jotmay miid.

Nej mibijcpidijc huaad jugy'ajtcixy chinaygixy

⁹ Naychójcigixy najjihuíyigixy miñ xyipy amuumdügjot, ca' y'ametz yjotmetzity. Ca' mnijot'ajtcixy jibic jot jibic-huinma'ñ. Nijot'ajtcixy nigí oyjot oyhuinma'ñ. ¹⁰ Naychójcigix najjihuíyigix amuumdügjot, jadu'n nej ypadyii mnaymigüg'ajtigixipy ma Jesucristo. Nayyajmij'ajtigix nigí nidüg nidüg miich ajcxy.

¹¹ Naymic'íjxigix cixyjot huinjot, ca' mnuux'ajtcix. Tungix amuumdügjot miid mHuindzin Jesucristo ycixpi.

¹² Tzinaaygix agujc jotcujc, com mnejhuüyb ajcxy co mbada'ñ oy'ajtin ma Dios. Mecxtujccix yi tzaachypi ayo'n huidibi mminajxyp myajnajxyp. Mibijctzoogix Dios jabom jabom.

¹³ Naybubéjtigix miñ xyipy, pen yajmayajtpy migüg tijaty. Nayyajjättácigix miñ xyipy oy yajxon.

¹⁴ Nibijctzohui' ma Dios huidibi ajcxy xy'ixhuidijtp xypahuidijtp. Nibijctzohui' mmidzip huen Dios may'ajt oy'ajt tuñ miid yi' ycixpi. E ca' mnibijctzohuiy co huen ayo'n paadipy.

¹⁵ Tzoc jotcujc nayjihuiyim co ajt nmigügtijc jotcujc ñayjihuiyi. Tzoc miidtajim miidmayim nmigügtijc pen tajp mayb.

¹⁶ Ooy yajxon nayyaj'íjtigix naygodigüiyigix. Ca' amij agix mnayjihuiyigixy. Migüg'adiyb yi mmigüg huidi ayoob. Yung naxy miid'at mjot mhuinma'ñ, ca' mnaygömaáyigixy.

¹⁷ Co jäy xymidundigóoygixipy, ca' huaad jibic myaj'ahuimbijtcixy. Hue' janchtiy oybi ajcxy mdunipy jadu'n nej jäy jëbi jäygidägy. ¹⁸ Oy nayyaj'íjtigix miid nidüg'óciy jäy mabaad mmadägy. ¹⁹ Miich ajcxy migügtijc, co jäy jibic xymidundigóoygixipy, ca' nañ jadu'n ajcxy myaj'ahuimbidity, mimecxtugipy ajcxy, com Dios yi' tzaachytunip yi jäy ajcxy huidi anajty xymidundigóoygixp. Com jaybety jadu'n ymiñ ma Dios ñecy jadu'n yminañ: “ñich nyaj'ahuimbidityich nej anajty jäy xymidundigóoygixy.” ²⁰ Co jäy xymidundigóoygixipy myaj'ahuimbidity ajcxy oybi, com jaybety jadu'n ymiñ ma Dios ñecy, ma jadu'n ymina'ñ:

Pen yi mmidzip yubo'cip, myajcayipy myaj'ügipy,
pen yi mmidzip tidziyipy, myajni'ügipy. Co
jadu'n mdunipy miid mmidzip huin'it tzöydu'n
jihuihuipy.

²¹ Pen myaj'ahuimbijtpy jibic co jäy xymidundigoy, ti
anajty jibic-huinma'n xymimadägy. Hue' janchtiy yajtun
mecxtujcin etz oyhuinma'n, e jadu'n jibicpi mimadägy
miid oybi.

13

¹ Copicy co nidüg'óciy jäy capxymidóogixipy yi cajp
tungmiidpi etz yi gobierno tungmiidpi. Ca' ji ni tüg
tungmiidpi huidibi jébi y'ane'my pen Dios ca' a'ixiy.
Com Dios jadu'n cötujcin ti yajhui'my co huen jii'aty
tungmiidpidijc, paady ycixpi tungmiidpidijc nidüg'óciy
jim mic'ajt paady ma Dios. ² Paady jäy ajcxy pinjaty
ca' ycapxymidoy ma tungmiidpidijc, hue' tundigooyb ma
Dios e tzaachypi ajcxy ypadaamyb. ³ Yi mijtungmiidpi
ca' yi' ajcxy adzigiy yi jäy huidijaty oyhuinma'n miid.
Hue' janchtiy yi' ajcxy chaachytunipy yi jäy huidi jibic-
huinma'n miid. Pen mdzojcyp co ca' tzaachypi mbaadipy
ma yi tungmiidpi, hue' janchtiy oybi mdunipy, e huin'it
m'idipy jotcujc. ⁴ Com Dios ti pidägy jada tungmiidpi miid
miich ajcxy ycixpi, jigix jébi jotcujc ajcxy mdzinaaygixy.
Pen mdundigooyb huin'it je tungmiidpi mdzigihuipy,
com yi' ymiid mic'ajt jébi tzaachytuñ jäy ajcxy huidibi
tundigooyb. Com Dios ytung ytuunipy etz ycuynuunipy
Dios ycötujcin jadu'n nej Dios xyñajtz'ane'miim, copicy
co tzaachytuñ je jäy ajcxy huidibi tundigooyb. ⁵ Paady
ycixp copicy mgapxymidohuipy tungmiidpidijc, jigix
ca' miich ajcxy Dios xychaachytunipy e nañ jotcujc
mnayjihuihuib co ca' anajty ti ti mdundigoy. ⁶ Yi

tungmiidpidijc Dios ycixpi ajcxy ytuñ, e ymiid ajcxy ycötujcin, paady ycixpi copicy mmigüedipy ajcxy.

⁷ Mgüedipy ma yi tungmiidpidijc huidibi xypaatp. Co ajcxy cajp meñ yajmucy, migüedipy. Co je gobierno tungmiidpi pidägy impuestos, migüedipy. Jäy ajcxy huidijaty tungmiid myajmij'adipy, etz huidi mijtungmiid mgömayipy. ⁸ Ca' pin minuucxy'adiyb. Tzoc jihui' mmigügtijc, e mgüedipy oy'amy huidibi mnuucxyp. Co yi mmigügtijc mdzogipy mjihuihuiipy ti anajty mguydundäy Dios ycötujcin. ⁹ Jadu'n Dios ycötujcin jaybety ymiñ, ma jadu'n ymina'n: "Ca' mmigapxtigoyipy huingbi töxyjäy. Ca' mmigüg mmeedzipy. Ca' mjäy'aj'ögipy. Ca' mmigüg m'adzojcopy ti ymiid." Pen mdzojcopy mjihuiyb migüg nej miich ci'm mnaychogyi ti anajty mguydundaayi Dios y'ane'min ycötujcin. ¹⁰ Je naychojcin je nayjihuiiyin ca'p je' ti jibicpi ti tzaachypi tuñ ma je migüg, co jadu'n jada mguydundaaiipy ti anajty Dios ycötujcin mguydundaayi.

¹¹ Com miich ajcxy mnejhuiyb co huingon je xii je tiempo mina Jesucristo mina'n jadüg'oc ya naax-huiñ, paady ycixpi jijp'ijxcix ajt nHuindzin Jesucristo co tzojc yminipy. E jadachambi ti yjac-huingoni mina miina'n iich ajt nHuindzin Jesucristo, ca'ydi co oga'n nmibijcim. ¹² Canaag jimijt jäy ajcxy ahuijxy jijp'ijxpy co Dios yajnödöga'nyii ajcxy y'alma, jadachambi ti yhuingoni je xii je tiempo mina n'alma ajt nidzoocin padaanim. Paady ycixp tzoc ixmajtzim yi jibic-huinma'n yi huidibi jäy ycuydumyib huidibi ca' Dios ytiy'ajt ne-jhuiyi. Tzoc cuychinaayim cuyjugy'ajtim Dios ytiy'ajt. ¹³ Tzoc tzinaayim jugy'ajtim tudägy. Tzoc cuyduunim Dios ytiy'ajt. Ca' huaad jadu'n ndzinaayim amügyjäy. Ca' huaad n'agootzhuidijtim xiicyaax xiictinaayim. Ca' huaad ndundigooyim miid huingbi töxyjäy. Ni ca' huaad ndziptuunim ahua'nduunim. Ni ca' huaad nmigüg

nmi'ijxtinaayim. ¹⁴ Tzoc cuychinaayim cuyjugy'ajtim Jesucristo ytiy'ajt. Tzoc tzinaayim tiydudägy jadu'n nej Jesucristo tiydudägy ti chinäy ya naaxhuiñ. Ca' nguy-duunim ti jibicpi ajt n'aa njot yja'adzojcpy.

14

Ca' migüg mbocy'ixy

¹ Miich ajcxy nmigügtijcich, copicy mgöbigipy agujc jotcujc ma miich mnayyöymújcigixy ajcxy yi migügtijc huidibi mibijcp je Cristo, per ca' tiydudägy huinjihuüy je Cristo ytiy'ajt. Mgöbigipy per ca' mhuingapxpedipy, ca' ti myaj'ayucyoonipy miid yi' ajcxy. ² Ti migügtijc huidibi minamb co Dios ca' ti jicxy capx'aducy, etz jëbi ajcxy jicxy huenytim ti jicxyity. Etz nañ ji migügtijc huidibi minam co Dios ti capx'aducy tzüch, paady ajcxy jicxy'adyii je'jada'ajty aay ujtz. ³ Yi migüg huidibi tzüch tzützp ca' huaad ixtijy je ymigüg huidibi yjicxpy je'jada'ajty aay ujtz. E nañ ni yi migüg huidibi jicxp aay ujtz ca' huaad ixtijy yi migüg huidibi tzüch tzu'tzp, com Dios ycöbijctaayb je jäy ajcxy huidibi ti mibicy Jesucristo. ⁴ Ca' huaad miich ajcxy mnimähuipy yi nmigüg co ca' oytuñ, tim jadu'n nipaady nej co tüg jäy nimähuipy huingbi jäy ytumbi co ca' oy ytuñ. Dios ci'm nimähuiip huidi ajcxy mibijcp Jesucristo, pen oytuñ o ca' oytuñ. Dios ypubejtyp pinjaty mibijcp, paady madaacp ajcxy ma chinaayin.

⁵ Nijëjity ajt nmigügtijc ymina'ñ co ooy ycopicyity n'amay'ajtim nijëjity xii, jacjadyii jäy ymina'ñ co ca' ycopicyity n'amay'ajtim jada xii. Huen nidüg nidüg yci'mhuinma'ñ yajtuñ pen y'amay'adamyb, o pen ca' amay'ada'ñ nije' nije' xii. ⁶ Hich ajt nmigügtijc huidi amay'ajtp nijëjity xii, hue' ajcxy tijy co Dios jadu'n tzojcp. E nañ hich ajt nmigügtijc huidi tzüch tzu'tzp, hue' ajcxy tijy co Dios jadu'n tzojcp, etz nañ yajnaxyp Dioscojuyip

ma Dios miid yjicxy ypicxy ycixpi. Nañ tim jadu'n ajt nmigügtijc huidi ca' tzüch tzüdza'ñ, hue' tijy co Dios jadu'n tzojcp, etz nañ yajnaxyp Dioscojuyip miid yjicxy ypicxy ycixpi.

⁷ Ca' iich ajt nayyajtzinaayim amidzooci'm, nañ jadu'n ca' iich ajt ci'm ndzojcin co n'o'cim. ⁸ Pen njactzinaayim hue' anajty nguyduunim ajt nHuindzin Jesucristo chojcin. Pen n'o'cim yi' anajty jadu'n ti yajcöducy. Pen njactzinaayim, o pen n'o'cim, tú'ciy nipaady, com Jesucristo nHuindzin'ajtim ma yi tzinaayin etz ma yi o'cin. ⁹ Paady ycixp Cristo y'o'cy etz yjugypijcy jadüg'oc jigix jëb nihuindzin'ajttäy yi' yjäy huidibi jactzinaayb jacjogy'ajtp, etz jigix jëb nihuindzin'aty yi täibi y'ögy.

¹⁰ ¿Na'amy co mmigüg mdzachpocy'ixy? o ¿Nej co mmigüg mdzach'ixtijy? Ca' jadu'n y'oyity co ajcxy jadu'n m'idich. Com nidüg'óciy ajt njádaanim ma Dios ytiydundac. ¹¹ Com jadu'n jaybety ymiñ ma Dios ñecy, ma jadu'n ymina'ñ:

Janch janch co iich, je tügpajcpi Dios, jadu'n nmína'ñich co tüg'óciy naaxhuiñyjäy xyhuingoxtinähuiibich xyhuindzigihuiibich, etz nañ tüg'óciy naaxhuiñy-jay xycapxpaadibich co iich je' tügpajcpi je Dios.

¹² Com Dios nhuindzin'ajtim, paady ycixp nidüg'óciy iich ajt nayguëxictähuaanim ma Dios yhuinduu, chi Dios xy'amidohuaanim nej ti ndzinaayim ti njugy'ajtim nidüg nidüg.

Ca' migüg myajhuinma'ñyđigooygixy

¹³ Paady ycixpi ca' huaad naynixiic naynigapxim miñ xyipy. Hue' janchtiy miich pidaaccix mhuinma'ñ co ca' ti mdungixipy huidi mmigügtijc ca' jäygidägy, huidi mmigüg yajpocycähuiib. ¹⁴ Nnejhuiybich tiydudägy co ajt nHuindzin Jesucristo ytiy'ajt xyajnejhuiyim co jëbi

njicxim huen tim huidi jicxy tim huidi picy. Je jicxy je picy ca' ma ycobocy. Per pen tüg migüg yhuinma'n pidacp co Dios ca' jäygidägy co yi' yjicxpy nijëjity jicxy picy, pues ca' yhuaadity co yi' jadu'mbi jäy jicxy huidi yi' ytijpy co ca' huaad njicxim. ¹⁵ Pen ca' m'oy'ity miid tüg migüg co ti mjicxy je jicx picy huidibi yi' ytijpy co Dios ca' jadu'n yaj'cöducy, chi ca' anajty mdzocy mjihuüy yi' mmigüg nej ypadyii. Com nañ Cristo ti y'ögy miid yi' mmigüg ypocy ycixpi, paady ca' huaad myajtigoy yi' mmigüg, miid co mjicxy huidi yi' ca' jäygidägy. ¹⁶ Ca' ajcxy m'a'ixiyygixipy co jibic yajnigapx yajnimiydägipy huidibi miich ajcxy myajnajxp co y'oyity. Oy miich mjahuinjihuüy Dios ytiy'ajt, per ca' huaad mdunipy huidi yi' mmigüg ca' jäygidägy, e huin'it xyñigapxipy jibic. ¹⁷ Canan Dios jadu'n ytiy'ajt xyñajtz'ane'miyyim huidijaty huaad njicxim n'uucim, o huidi ca' huaad njicxim n'uucim. Hue' janchtiy ti xyñajtz'ane'miyyim nej jëbi tiydudägyi ndzinaayim njugy'ajtim. Nej jëbi jotcuyc n'ijtim miid ajt nmigügtijc. Nej jëbi jotcuyc nayjihuiyyim miid Dios ymic'ajt ma njot nhuinma'n. ¹⁸ Co jadu'n nguyduunim nej Cristo ytiy'ajt ti xyñajtz'ane'miyyim, huin'it jäygidägipy Dios etz nañ jadu'n jäygidägipy jäy ajcxy nej anajty nduunim.

¹⁹ Tzoc panicxim je huinma'n jadu'n nej jëbi ndzinaayim agujc jotcuyc miid ajt nmigügtijc, ca' ma ti tzip ti capxy nmiid'ajtim. Tzoc yajtuunim je huinma'n jadu'n nej jëbi huaad naybubejtim nidüg nidüg nej jëbi huaad nguychinaayim Dios ytiy'ajt. ²⁰ Ca' huaad nyajtigooyim Dios ytung miid tzip capxy jadu'n nej huidi jëbi huaad ndzüdzim, etz huidibi ca' huaad ndzüdzim. Janch tiy'ajt co Dios ca' ti jicxy ti picy capx'aducy, per pen njicxim huidijaty nijëjity ajt nmigügtijc yajcobojcpy, e jadu'n nyajhuinma'nydigooyim

ajt nmigüg, chi nmidundigooyim Dios ytiy'ajt. ²¹ Tiy'ajt jadu'n co ca' huaad tzüch ndzüdzm etz ca' huaad vino n'uucim, o jactijaty huidibi ajt nmigüg yajcoboicpy. Com co jadu'n ajt n'idiidzm, hue' anajty ajt nmigüg nyajhuinma'ñydigoyaanim ma ymibijcin. ²² Miich ajcxy huidibi huinjihuüyb Dios ytiy'ajt co Dios ca' capx'aducy ti jicxin ti pijcin, ca' mnimiydacconaxipy miid jäy ajcxy. Dios ñejhuüyb co miich mhujnhuüy yi' ytiy'ajt. Jëbi jotcuyc mdzinähuipy pen mguychinaayb je huinma'ñ huidibi miich mnejhuüygixyp co ytudägyity, e huin'it ca' jibic mnayjihüüyb ajcxy. ²³ Tundigooyb yi' migügtjic huidibi jotmetz jücxp nijëjity jicxy picy, miid co tzigüyb yi' co Dios ymijotmädiyb co ti jicxy huidi ytiypy co ycobocy. Tundigooyb jadu'n com ca' ti cuyduni Dios ytiy'ajt nej ci'm ti yajniguejy. Pen ca' nguyduunim jadu'n nej huinjihuüyim Dios ytiy'ajt, tundigooyim anajty.

15

Tzojic migügtjic, ca' ñaydüg mnaychogyii

¹ Ich ajt huidibi tiydudägy nmibijcin etz huinjihuüyim Dios ytiy'ajt, copicy nmimecxtujcim ajt nmigügtjic huidibi ca'ni huinjihuüy yajxon Dios ytiy'ajt. Ca' huaad ti nduunim miid ngi'm jäygidaacin ycixpi. ² Copicy nyajtuunim oyhuinma'ñ miid ajt nmigügtjic, jadu'n nej jëbi ajt nmigüg jäygidägy, etz jadu'n nej jëbi nbubejtım ajt nmigüg miid ymibijcin. ³ Com nañ Cristo ca' ti ytuñ miid yci'm jäygidaacin ycixpi, com jaybety jadu'n miñ ma Dios ñecy, ma je Cristo nimay Dios Teedy: “Miich mmidzip ajcxy huidibi xyñigapxp xyñi'ojüyb, xyñigapxpich xyñi'ojüybich ajcxy nañ jadu'n.” ⁴ Com tüg'óciy Dios y'ayuc huidibi ycojay jecy'ajty, hue' cojay miid ich ajt ycixpi, jigix jëbi Dios

ytiy'ajt nbaatim. Dios ytiy'ajt xyajnejhuiyim co Dios jadu'n tzocy co nmimecxtujcim ajt nmigügtijc. Nañ Dios y'ayuc xyjot'amijmooyim, e nañ xyajnejhuiyim jadu'n jëbi njijp'ijxim pubejtin ma Dios. ⁵ Com Dios, yi' je' huidi xypubejtim miid mecxtujcin, e nañ xyjot'amijmooyim, paady huen Dios may'ajt tunipy ma miich ajcxy mjot mhuinma'ñ, jigix jëbi mmiid'idipy tú'ciy mjot mhuinma'ñ nej Jesucristo yjot yhuinma'ñ miidity, e jadu'n jëbi mnayyaj'oy'íjtigixy jotcuyc ca' ma tzip capxy. ⁶ Dios miich ajcxy xypubedipy xypudigíhuipy, jigix jëbi myajtügíygixy mjot mhuinma'ñ, etz tú'ciy m'ojadajtcixipy mhuindzigíygixipy Dios Teedy etz ich ajt nHuindzin Jesucristo.

Jesucristo y'ayuc yajcapxhuäcxy ma huidibi ca' yjudío-jäyity

⁷ Naygöb'ijcigix nidüg nidüg agujc jotcuyc, tim jadu'n nej Cristo xycöbijccixy agujc jotcuyc. Co mnaygöb'ijcigixipy nidüg nidüg agujc jotcuyc, huin'it Dios capxpaady y'idipy. ⁸ Janch tiy'ajt co Cristo y'oy ya naaxhuiñ, oy pubety judío-jäy ajcxy, e jadu'n cuyduñ Dios ytiy'ajt huidi yajhuinhuaniiy Abraham, Isaac etz Jacob jecy'ajty co jadu'n tuna'ñ miid yi' ajcxy ycixpi. ⁹ Nañ jadu'n Cristo ooy pubejty yi' huidibi ca' yjudío-jäyity, jaydëbi ajcxy capxpaadipy Dios, miid co ti ypa'ayoyii ajcxy. Com jaybety jadu'n ymiñ ma Dios ñecy, ma jadu'n David ymiñ:

Com miich Huindzin Dios ti xycohua'ñich paady miich ngapxpaady ma yi jäy ajcxy huidibi ca' yjudío-jäyity. Hch miich nhuin'ihuiipy miid himnos.

¹⁰ E nañ jaybety jadu'n ymiñ ma Dios yñecy:

Jotcuyc'ajtcixy quipxy miid Dios yjäy miich ajcxy huidi ca' yjudío-jäyity.

¹¹ E nañ jaybety jadu'n ymiñ ma Dios ñecy, ma jadu'n ymina'ñ:

Capxpaatcix yi Huindzin Dios miich ajcxy huidi ca' yjudío-jäyity. Capxpaatcix yi Huindzin Dios miich ajcxy nidüg'óciy naaxhuiñyjäy.

¹² E Isaías ycojay nañ jadu'n ma yi' ñecy, ma jadu'n ymina'ñ:

Ma'xung'adamb tüg Isaí y'ap y'oc, e yi' ane'mamb yi jäy huidibi ca' yjudíojäyity. Co yi jäy ajcxy huidibi ca' yjudíojäyity mijpidägipy je mij'ane'mbi, hue' ajcxy yjijp'ixpy co möhuaanip oy'ajt.

¹³ Nmibijctzooybich Dios miid miich ajcxy ycixpi huidijaty mibijcp Jesucristo, com njjip'ixim co Dios xymöhuaanim oy'ajtin. Nmibijctzooybich Dios miid miich ajcxy ycixpi co huen xyajjotcugihuiip ajcxy, e nañ co huen xyajpoocxipy mjot mhuinma'ñ. Nmibijctzooybich Dios co huen xypubejtcixy xypudigiiygixy miid yi' yjihui'ñ ymic'ajt, jaydēbi mjijp'ixipy ajcxy co mbaadip oy'ajtin mijcagee ma Dios.

¹⁴ Miich ajcxy migügtijc, jotcujc nayjihuiiyijich miid miich ajcxy ycixpi, com nejhuiiybich co miich ajcxy miidity oyjot oyhuinma'ñ, e nañ mhuinjihuiiyb ajcxy tüg'óciy Dios ytiy'ajt, paady jēbi mnayyaj'ixpíjigixy nidüg nidüg. ¹⁵⁻¹⁶ Jotmic'amy ti nyajjäymejtzcoodyich miich ajcxy nijējity Dios ytiy'ajt ma jada necy huidi nyajnijayiyb ajcxy cham, com Dios may'ajt oy'ajt ti tuñ miid iich, e ti xyhuin'ixyich jaydēbi nduñich Jesucristo ytung ma yi jäy ajcxy huidi ca' yjudíojäyity. Jadu'n nduñich miid Dios ycixpi, co ngapxhuäcxyich je oybi tiy'ajt jadu'n nej Jesucristo y'o'cy miid jäy ajcxy ypocy ycixpi. Jadu'n Jesucristo ytuñ jigix jēbi Dios cōbigipy yi mayjäy ca'pi yjudíojäyity huidi ti mibicy Jesucristo etz

huidibi yi Espiritu Santo ti yajhuäch je jibicp ma ajcxy yjot yhuinma'ñ.

¹⁷ Com Jesucristo ytiy'ajt yajpaatp ma ich njot nhuinma'ñ, paady ycixp ooy jotcuyc nayjihuiyijich co nduñich miid Dios ycixpi. ¹⁸ Jada janchtiy ich nyajmiidmiydacy miich ajcxy je may'ajt huidi Cristo ti tuñ co ngapxhuäcxich yi' y'ayuc. Ca' nyajmiidmiydaaccixy huidi Cristo ytumyb miid jacpinjaty. Miid co ngapxhuäcxich Cristo y'ayuc, e nañ mijhuinma'ñ ndumybich miid Cristo ymic'ajt, paady mayjäy ycapxymidooyb Dios huidi ca'p ajcxy yjudójayity. ¹⁹ Ti ngapxhuäcxich tüg'óciy Cristo ytiy'ajt nej jébi ajcxy y'alma ñidzoocin paadip. Jim nyajtzondacyich Jerusalén, e ti nhuidijttäyich canaag agajp mabaad nja'tyich jim Ilirico ñaaxjot. E Dios yjihui'ñ ymic'ajt xypubejtich xypudigiyich co ich mijhuinma'ñ nduñich, etz Dios ytiy'ajt nyéjcbich. ²⁰ Ooy nijot'atyich co ngapxhuäcxibyich Jesucristo ytiy'ajt ma anajty ca' pin jayijp capxhuäcxyni. Ich oga'n Jesucristo y'ayuc jim nmnicxi ma yi jäy ajcxy huidi ca' anajty midoy Jesucristo ytiy'ajt. Jadu'n nduñich, jigix ca'ydi njijptigiyiyich ma huingbi anajty jayijp ti capxhuäcxí Jesucristo ytiy'ajt. ²¹ Com jaybety jadu'n ymiñ ma Dios ñecy, ma Dios jadu'n ymina'ñ:

Yi jäy ajcxy ymidohuaanip Cristo y'ayuc huidibi ca'ni anajty midoogixy. Yi jäy ajcxy yhuinjihuñhuaamyb je Cristo ytiy'ajt huidibi ca'ni anajty nejhuiyigixy co yjijity je Cristo.

Pablo huinmay co ñicxa'ñ jim Roma

²² Com ooy ndzachcapxhuäcxich Cristo ytiy'ajt canaag agajp, paady ca' nyajnibadiyich nícxybyich ma mich ajcxy. ²³ Canaag jimijt ndzachnijot'atyich anajty

nicxa'ñich ma miich ajcxy. Ixti chamni ti nhuidijttäyich majaty anajty nhuidida'ñich. ²⁴ Paady njijp'ijxypich co jëbi nnaxihuibich ma miich ajcxy co anajty nicxyich jim España ñaaxjot. Huäcxibaambich jim ma miich ajcxy jëbi hueeni ajcxy ngapxim nmiydaacim. Nañ hue' njijp'ijxypich co xypubedaambich miich ajcxy miid ndu'amgixpich. ²⁵ Jayijp nnicxa'ñich jim Jerusalén, chiini nnicxa'ñich ma miich ajcxy. Nminicxaamybich jim Jerusalén hueeni meen huidibi nyegaamybich ma yi mibijcpidijc jim Jerusalén miid ayoobtjic ycixpi. ²⁶ Com yi mibijcpidijc ya Macedonia etz Acaya ñaaxjot ti ajcxy yhuinma'ñ pidaaccixy co ajcxy pubeda'ñ yi ayoobtjic jim Jerusalén huidibi mijpidacp Jesucristo. ²⁷ Ooy ajcxy jotcuyc ñayjihuiyii co ymigügtjic pubeda'ñ jim Jerusalén. Paatip co pubedipy ajcxy, com ma yi judíojäy ajcxy, jim ajcxy ti paady Dios ytiy'ajt, paady paatip ajcxy huidi ca' yjudíojäyity co pubedipy yi judíojäy ajcxy. ²⁸ Co anajty ti nyajcidigiydaaygixy je meen huidibi yi migügtjic ya Macedonia etz Acaya ti yajmujccixy miid je mibijcpidijc ycixpi huidibi yajpatp jim Jerusalén, hui'it nnicxa'ñich jim España ñaaxjot. Nnaxihuaambich ma miich ajcxy co anajty jim nnicxich. ²⁹ Nejhuiyibich co anajty jim naxiyich ma miich ajcxy, je Cristo xypubedipich je ymic'ajt, e nyegipich Cristo ymic'ajt ijsxpejt etz nyaj'ixpigipyich mich ajcxy je Cristo ytiy'ajt.

³⁰ Miich ajcxy nmigügtjicich, com miich ajcxy mijpidaaccixyp ich ajt nHuindzin Jesucristo, e com miich ajcxy miid Dios yjihui'ñ ymic'ajt ma m'aa mjot, e nañ xychojcpich xyjihuiyibich, paady ycixp nbijctzooyich may'ajt, yajtügiiygixy m'ayuc mhuinma'ñ miid ich, jëbi tú'ciy Dios nmibijctzoohuim mictägy miid ich ycixpi. ³¹ Mibijctzoogix Dios co huen xyñihua'ñich

xycohua'ñich ma yi judíojoy ajcxy jim Judea naaxjot, huidibi xyca'ixaambich co ajcxy ca' mijpidägy Jesús. Nañ mibijctzoogix Dios co yi mibijcpidijc jim Jerusalén cöbigipy ajcxy oy yajxon je pubejtin huidibi ñich jim ng'iyegaamy. ³² Mibijctzoogix Dios co huen xypubedipy xypudigihuibich, jëbi n'icxibich ma miich ajcxy agujc jotcuyc, ca' ti jotmay, pen Dios jadu'n tzojcp, etz nañ jëbi nhuäcxibipich jim ma miich ajcxy agujc jotcuyc, e jim ñich nhuinma'ñ nyajpocxip. ³³ Mibijctzooybich Dios miid miich ajcxy ycixpi, je Dios huidibi jotcuyc'ajtin yejcp, co huen miich ajcxy xypubedipy xypudigihuiipy. Jadu'n jadu'n. Amén.

16

Capxpocxin nidüg nidüg ma pinjaty y'ixy'ajtyp

¹ Cham ñich miich ajcxy nyajnbijccixy, cöbijccixy je ajt nmigüg töxyjäy je Febe co anajty ñicxy ma miich ajcxy. Yi' je' nidügti huidibi pubejtin tumb ma je mibijcpidijc jim Cencrea. ² Mdunipy may'ajt mgöbigipy Febe miid ajt nHuindzin Jesús ycixpi. Com jadu'n ycopicyity co jäy huidibi mibijcp Jesucristo huen naymigüg'ájtigixy. Mbubedip mbudigihuiip jadu'n nej yi' jotmay miidity. Yi Febe ti ooy mayjäy pubety, e nañ ti xypubetyich.

³ Nguejxypyich capxpocxin ma jada necy miid yi Priscila etz Aquila huidibi ñich anajty miid ooy oy nduñ co ngapxhuäcxyich Cristo ytiy'ajt. ⁴ Yi Priscila etz Aquila yojx ytooc ajcxy yjugy'ajtin miid ñich ycixpi, ca'ydi n'ögyich. Nyajnajxypich jäygidaacin ma Dios miid yi' ajcxy ycixpi, co ti xypubetyich ajcxy. E nañ jadu'n tüg'óciy jäy ajcxy huidibi ca'pi yjudíojoyity yajnajxcixy jäygidaacin ma Dios miid yi' ajcxy ycixpi. ⁵ Nguejxypich capxpocxin nañ jadu'n ma jada necy miid yi mibijcpidijc

ajcxy huidijaty naymujccip ma Priscila etz Aquila ajcxy ytijc. Etz nañ nguejxpyich capxpooocxin ma yi Epeneto huidibi ooy ndzocyich. Yi' je' tim jayijp huidibi mijpidaac Cristo jim Acaya ñaaxjot. ⁶ Etz nañ nguejxypich capxpooocxin ma María, yi' ooy ti ytuñ miid miich ajcxy miid Cristo ycixpi. ⁷ Etz nañ nguejxpyich capxpooocxin ma yi Andrónico etz Junias. Hich n'amigüg ajcxy huidibi ti ypujxtijc iñay quipxy miid ich. Capxpaady ajcxy y'ity miid yi apóstoltijc. Jacjayijp ajcxy mijpidacy Jesucristo ca'ydi ich.

⁸ Etz nañ nguejxypich capxpooocxin ma yi Amplias, huidibi ooy yajxon mijpidägy ajt nHuindzin Jesucristo. ⁹ Nañ nguejxypich capxpooocxin ma yi Urbano huidibi xymiidtuñich co ich anajty ngapxhuäcxyich Jesucristo ytiy'ajt. Nañ jadu'n nguejxypich capxpooocxin ma yi Estaquis huidibi oy ndzocy njihuüyich. ¹⁰ Nañ nguejxpyich capxpooocxin ma yi Apeles, huidibi ooy tiy'ajt ti yecy co yi' ymibijcpsy Cristo tiydudägy. Nañ nguejxypich capxpooocxin ma yi Aristóbulo etz jac pinjaty huidibi yajpatp ma yi' ytijc. ¹¹ Nañ nguejxypich capxpooocxin ma ich n'amigüg yi Herodión. Etz nañ nguejxypich capxpooocxin ma yi Narciso yjuugy ymigüg huidibi mijpidacp ich ajt nHuindzin Jesucristo. ¹² Nañ nguejxypich capxpooocxin ma yi Trifena etz Trifosa huidijaty tumb ma ajt nHuindzin Jesús ytung. Nañ nguejxypich capxpooocxin ma Pérsida, je migüg huidi oy ndzocyich, etz nañ huidi ooy ytuñ ma ajt nHuindzin Jesucristo ytung. ¹³ Nañ nguejxypich capxpooocxin ma yi Rufo, je huidibi yi mibijcpidijc ycömaayb. Nañ nguejxypich capxpooocxin ma yi' ytaj, com jadu'n njihuüyich jadu'n nej jihuüy yi' ndaj'adyiijich. ¹⁴ Nañ nguejxpyich capxpooocxin ma yi Asíncrito, yi Flegonte, yi Hermas, yi Patrobas, yi Hermes etz ñan tüg'óciy yi mibijcpidijc huidi jim yajpatp ma yi' ajcxy. ¹⁵ Nañ ngue-

jxpyich capxpooxñin ma yi Filólogo, yi Julia, yi Nereo etz yi' y'uch töxyjyábi, yi Olimpas, etz nañ tüg'óciy yi mibijcpidijc huidibi yajpaatp jim ma yi' ajcxy.

¹⁶ Naygapxpóocxigix xic xon nidüg nidüg. Naygimájtzigix miñ yxipy agujc jotcujc. Tüg'óciy huidibi mibijcp Jesucristo ma yi jacjaydyii cajp, yquejxyp ajcxy capxpooxñin ma miich ajcxy.

¹⁷ Miich ajcxy migügtijc, may'ajt nbijctzooybich naygüend'adi' ajcxy ma yi jäy ajcxy huidibi mimiimb ayuc ca'pi ytiy'ajtity, huidibi nigoob yjäyyajtziptuna'ñ yjäybijc-huäcxa'ñ, huidibi ca'ixa'ñ yi Dios ytiy'ajt huidibi ti m'ixpijccixy. Puuhuäctüd miich yi' ajcxy. ¹⁸ Com yi jäy ajcxy huidibi ymigügtijc yajhuinma'ñyidigooyb, ca' ajcxy tuñ Jesucristo ytung. Hue' ajcxy yaj'ixpijcp huidi yci'mhuinma'ñ yci'mdzojcin. Je' ajcxy huin'ñinigixp je jäy ajcxy huidibi ca' mijcajee y'ixpicyity. Yi ayuc huidibi ymihuidijtyp, jadu'n yajmidoy nej jihuiy oy ytiyity yjanchity, per ca' yi' yjanchity. ¹⁹ Com mayjäy ti xyajmidooyich jadu'n nej miich ajcxy mgapxymidoy Jesucristo, paady jotcujc nayjihuiyijich miid miich ajcxy ycixpi. Ndzojcypich co miich ajcxy mnejhuñhuipy huidibi oyhuinma'ñ jaydebi mdúngixipy ajcxy etz ca' jibic-huinma'ñ mdúngixipy. ²⁰ Dios oyhuinma'ñ etz mic'ajt ti xymooyim jébi ndzinaayim miid ajt nmigügtijc agujc jotcujc, ca' ma tzip capxy. Tim huingon je xii je tiempo mina Dios yajcödígoya'ñ yi mujcu' ymic'ajt, e yi' xypubedip xypudigihuij jébi mmimadägipy yi ca'oybi. Nmibijctzooybich Dios miid miich ajcxy ycixpi co iich ajt nHuindzin Jesucristo huen may'ajt oy'ajt tuñ miid miich ajcxy jabom jabom.

²¹ Je Timoteo huidibi tumb miid iich co ngapxhuäcxich Jesucristo ytiy'ajt xyajniguejxp ajcxy capxpooxñin. Nañ

jadu'n Lucio, Jasón etz Sosípater ñich n'amigüg ajcxy, xyajniguejxp capxpooçxin.

²² ñich Tercio huidibi cojaayb Pablo y'ayuc ma jada necy, nañ nguejxypich capxpooçxin ma miich ajcxy, com ñich nañ jadu'n nyajpaadyich ma ajt nHuindzin Jesucristo.

²³ Nañ jadu'n Gayo xyajniguejxp capxpooçxin, yí' xya-jjättacich. E nañ je jäy ajcxy huidibi mijpidacp Jesucristo huidibi ajcxy nayyöymujcip ma Gayo ytijc yquejxyp ajcxy capxpooçxin ma miich ajcxy. Erasto je cajp ytesorero etz ajt nmigüg huidibi yxií Cuarto, nañ xyajniguejxp ajcxy capxpooçxin.

²⁴ Nmibijctzooybich Dios miid miich ajcxy ycixpi jabom jabom co ñich ajt nHuindzin Jesucristo huen may'ajt oy'ajt tuñ ma miich ajcxy. Amén.

Je capxpooçxin ma yaj'íibaady yajcapxpaady Dios

²⁵ Tzoc cōmayim Dios, tzoc ojadajtim, tzoc huin'íihuim miid himnos. Dios miid ymic'ajt jēbi xypubedipy xy-pudigíhuipy ajcxy, jaydēbi ajcxy tiydudāgy mmibigipy Jesucristo, ca'ydi mjotmetzciiygixy. Tim jadu'n nej je oybi tiy'ajt huidibi ngapxhuäcxpich tim jadu'n nej je Jesucristo ytiy'ajt huidibi jacjadyii jäy ycapxhuäxcixyp. Jada je tiy'ajt huidibi jecy'ajty ca' pín huinjihuüy huidibi Dios ti xyajnejhuüiyim. ²⁶ Dios ti xyajhuinjihuüiyim nej yhuimbidzimy je ayuc huidibi je profetas ajcxy ycojay jecy'ajty. Dios huidibi tzinaayb huinixí huinitiempo, ane'mb co huen yajcapxhuäcxy jada tiy'ajt oybi ma tüg'óciy naaxhuiñyäj, jigix jēbi mayjāy mijpidägip etz capxymidoohuipy Dios.

²⁷ Miid co Jesucristo ooy mijhuinma'ñ tuñ miid ñich ajt ycixpi, paady tzoc cōmayim, tzoc ojadajtim etz tzoc huin'íihuim miid himnos huinixí huinitiempo yi

ROMANOS 16:27

61

ROMANOS 16:27

tügpajcpi Dios huiðibi ñejhuiydaayb tüg'óciy. Jadu'n
ngapxcíxyich. Amén.

El Nuevo Testamento en mixe de Coatlán

New Testament in Mixe, Coatlán (MX:mco:Mixe, Coatlán)

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16
